


# TI OKHUMA WA NSUWA

 Nrowe nuuramihe muru ahu. Pwiya, nithukumanne-ene va voosiis'ula wooreera wa Paasikha, noonaka ithutu sipaceryaka ophuwa, enwi ekelaka ekuxaka mpantte aya, axipalame yiipaka ntoko wira mirima saya saarowa ophutuwa ni ohakalala, okhala wira ookhala Paasikha. Hiyo ninnaamini wira Nyuwo moomuhihimuxa Yesu mw'alipa-ookhwa, miyaakha sinci-ene sivinre, olelo, ni nintthapela nihiku nla na muupuxeryo.

<sup>2</sup> Ni mutthuniherye akhale Paasikha eriyari ahu hiyo othene, olelo. Mutthuniherye wira hiyo, ntoko arumeyi Awe, niiwe saana Masu Awe, wira hiyo naari moopatthanani mw'Awe okathi ule, ni wira vano hiyo noohihimuwa ni Yoowo nikilaanthe vamosa mapuro a Wirimu.

<sup>3</sup> Mureerihe muteko va mutapernakulu, ni mwa ilapo sikina omphiyaaya, ni telefooni ola.

<sup>4</sup> Mwaavonihe aretta othene n'ale ooriipiwa murima. Wira akhale Paasikha wa yaawo, nave, ni okhuma mw'ereetani mpakha ikuru. N'ale akhwiiye mutampini ni soottheka, awo akhale akumi olelo mwa Kristu. Nto hiyo ninimoovuwihani Nyuwo, vano hiyo ninvekela mwa Nsina Nawe. Amen.

<sup>5</sup> Vekeekhai kinnitthokelela ola okhala mureerelo woothamaleya, voosiisu ula okhala-tho nno oJeffersonville, Indiana, ni muthukumano ola muulupale, ekereja yoosarya ni atthu yeemenle, ni mapuro othene ni vate, ni vampwehiwa ikaaro ni mapuro othene. Wa nyuwo atthu mutelefoonini mulaponi mothene, ola voosiisu wooreera va.

<sup>6</sup> Ewoora yaneethanu voosiisu ula, mpatthani aka mwaamukhaani orina etthirima yooxeerya aahivavela vacanelani khukivenxa. Yaakhala wira murima awe mwaamukhaani waamphuleya, airaka, "Owo oohihimuwa." Kweekwe kinnimuupuwelaka mwaapalame ola okhala mpatthani aka, okhala wira onnikisivela.

<sup>7</sup> Ntoko ehimale-aya ehantisi ysa yoowo wira, "Aahikhala mwaapalame mmosa ookhwila aamoonale Owo ahaawaka vamwiikimanyo, vaavo etampi yaamuhenlyaya-vo Yoowo." Vekeekhai, mwaapalame mwaamukhaani khaarina etampi. Owo khaarina yo omukhwela mwaapalame mwaamukhaani. "Masi owo aahivavela vamwiikimanyo khuphavela ophela ipereku, ni munupi awe mukhaani, vano ekuuku awe yothene khukhala yooxeerya." Ni ti siiso kintthunaaka yawaka, nave, ntoko eyaakiheryo, yo ophavela okhapelela Etthu ila yoovuwa Owo okhwenle-awe.

<sup>8</sup> Nisuwelaka wira okathi ahu ti wowaalakeya va, vanci-enexa w'axipatthani ale aniiwa mutelefoonini yeela, kaatthuna kootthokeleliheni voosiis'ula wa e—elatarato ekumihiwe ni kaamera woovira okathi vakhani, ya yoowoona kaakhalanne aka va otapernakulu, yo okhuma oIndiana, orowa wArizona; weiwo kaarowaaka okumanana, ni ekhalelo y'epiraamite, Malaikha mathanu na manli. Kihisuwelaka exeeni yaarowa okhumelela ohoolo waya, nuuphiya iwe, kuupuwelaka wira yaarowa okhala emalelo y'ekumi aka, tthiri khaavo aarowa owerwa ovilela erumelo eyo; ni kookupali wira nyuwo othene munnimusuwela wahala ene. Vano nto Okhatoni Sabino, voosiisu omosa ntoko ola, kivekelaka, aahikhala xoowa aaheliwe mmatatani mwaka, nto khwira, "Ala Masu, ni Xoowa a Masu."

<sup>9</sup> Ohoolo waya, Malaikha yaahikhumelela ntoko saalaleeriwe-aya. Okathi ene yoowo, ethukumanyeyo yuulupale ya Waarya khukhuma veemenlyaka-vo, khweetta ikilomo miloko mixexe ni thanu na tthaaru osulu, khupaka ntoko nreko, ntoko mapupha a Malaikha, ni khukweretha osulu mukhalelo w'epiraamite mwa nikhuru nenlo na Malaikha naakhumelenle.

<sup>10</sup> Siyensiya ookumiherya elatarato, okhuma oMeexiku, okathi weettaaya okhuma onkela epheyo wa wArizona, weiwo Erooho Yoowaarya yaahimme-aya wira miyo kaamukhala keemenle, "ikilomo miloko mithanu na mosa ni xexe onkela epheyo wa oTucson." Ni khuwela osulu, nto erevista *Life* khulaleerya ilatarato sene, "Etthu yootikiniha musulu, weiwo wahaakhanle okhalaka-wo enaanelo, weiwo wahaakhanle okhalaka-wo nikupetthe na etthu; ikilomo miloko mixexe ni thanu na tthaaru, ni ikilomo miloko mixexe ni tthaaru etaphuwelo," nirwaaka okhuma weiwo yaari Malaikha ale.

<sup>11</sup> Vano, awo khukoha, wira esuwele. Siyensiya, mmosa a yaawo oTucson wu, aatthuna osuwela nkhamu yaanihimya etthu, masi miyo khuhaaleela. Nyuwo othene mwaahisuwela, yaahihimmwa khalayi ene. Masi khayaari ya yaawo; yaari yawinyu.

<sup>12</sup> Nto siiso Owo khulavula ni miyo, khwira, "Ikanyeryo Thanu na piili sinootaphuliwa. Isiiri thanu na piili, esiiri yoowipithihiwa vaara vathanu na vaili ya mBibiliyani, etthukiwe okhuma opattuxiwaka-ru olumwenku, enoorowa wuupululiwa." Nto hiyo, niryeeene nikhuru noowiyeviha naamukhaani, voolikanyiha n'ulumwenku wothene, hiyo ninnipuha iparakhia iya, wiiwa isiiri iyo. Othelana, omwalana, epyo ya enowa, sookoha iya sothene soohiyana-hiyana, nihuupululeliwa voomalela, kahi ni mutthu, masi ni Muluku, Mwaneene, etaphunle isiiri iyo thanu na piili; wa ele yaari Ekereja, moota Eyo yaary'aya mwa Kristu wopaceryani, ni moota Eyo yaarowaaya wuupululiwa nihiku nookiserya.

<sup>13</sup> Nto vano, okathi ela yaawelaaya, nookhalana elatarato

ene ota vanipaweni. Masi, nto, kookhalana elatarato ene eri va, mwaweha vale, ntoko erevista *Life* yaakumihenrye-aya. Masi kinniikoha vakhala wira muthukumano aka, onooneya va, vekeekhai wootoko oweha elatarato ene, moone, enamuna yaatthuneyaaya.

<sup>14</sup> Muupuwele, miyo kaamulaleya okathi yoowoona ela jaarwiiye-aya, mwaha wa Eliivuru ya Wiisuupulula, vaavo aphuki a khalayi, vaavo nimoonale-ahu Yesu mwa Wiisuupulula 1. Okathi opacenrye-ahu otaphula Ikanyeryo Thanu na piili. . . ahiiso o—ahiiso Okathi wa Ekereja, kiireke, sihinatthi otaphuliwa Ikanyeryo Thanu na piili. Kristu eemenle ni “maihi ntoko manri, ootteela.” Nto miyo kaahoolakiheryani yeeyo, wira aphuki a khalayi Ankelesi, ni aphuki a khalayi, okathi waarowaaya opwaro wa milattu, wira yalapehele, okhulupale aya woomalela yaanivahiwa. Yaawara eperuuka yootteela, ntoko saari-aya, vamuru vaya, wira yooniherye okhulupale aya woomalela.

<sup>15</sup> Ahe, nyuwo mwarukunxaru elatarato ene *sa* khuweha, khino munoowerya woona vamuthukumanoni, ti Kristu. Munnoona maitho Awe awehaka *nno*, voolikana ntoko sikhanelaya okhalaka; owanre-ene eperuuka yootteela ya oMuluku Muulupale ni Mphuki a wirimu wothene ni vathi. Munniwerya woona maitho Awe, ephula, eyano Awe? [Muthukumano oniira, “Amen.”—Mol.] Murukunxele elatarato ene *sa*, ohiya enamuna awo jaarinaaya; epantte *ela*, enamuna entthuneyaaya okhala. Ni nyuwo. . . Munniwerya woona? [“Amen.”] Owo ti Mphuki Muulupale. Khaavo hata mukina woohikhala Yoowo. Ni iwo osuwanyeihiwa wooloka voomalela, olipiheriwa wira Mutthak’ola ti Ekeekhai. Ela Ekeekhaii. Eyo ekeekhaii. Ni omukhalihaka Owo kahi Mutthu aneeraru, masi Mutthu mmosa paahi!

<sup>16</sup> Ni yootteela, moone, munnoona oriipela, wiitho Wawe, ireru Sawe, ni maitho Awe. Ni nwehe, Owo onweha. . . Mwa Yoowo onkhuma Waarya nno waaryelaka epantte ya moonoo woolopwana, weiwo Owo onwehaawe. Ni vamwiikimanyo, ti vaavo Owo aawenhe-awe, moonoo woolopwana, vaavo Owo aamulevelenle-awe natampi. Mowaaryani wa ohihimuwa Wawe, hiyo nlelo ninnitthikela neettaka mwa Nsina Nawe.

<sup>17</sup> Kaanithuna, voosiisu ula, kaarina okathi munci-ene wira—wira kivirihe kilavulaka yookhumelela yeela ehinreere ovikana khula ohoverya, sinooniheriwaka mwa miyaakha miloko miraru sivinre, ahiiso miloko miraru ni mithanu, vaava va ekereja yeela; okhuma omuratthini wu, okathi Waarya omosaru waakhurunwe-aya nno oJeffersonville, mwa 1933, khulavula moolumo awo, “Ntoko Yohani Mpatisa aarummwaly’awe wira ahoolele orwa woopacerya wa Kristu, Mutthaka anyu onoocholela wa neeli.” Hiyo nri okathi wa wookiseryani, ni ninnoona. Hiyo imaara sikina ninniikoha xeeni ohimwarenlyaya

mulaponi; khino okathi uwo ninookhalana okathi w'oleeliherya yeeyo, Muluku athhuna vale.

<sup>18</sup> Vano kintthuna wira mwaakhunle a—aBibilia anyu, ntoko hiyo kweekwe ninaamini-ahu wira Masu ahaana orwa toko, osommwa wa Masu. miyo okathi wothene kinnisoma Yaawo, okhala wira Awo. . . Masu aka ti masu a mutthu, awo anoovonya; masi Masu a Muluku khankhalakhala avonyaka.

<sup>19</sup> Vano ninrowa o—osoma mwa Soolempwa Soowaarya, yoosoma emosa. Ni nintthuna wira mukhunle, toko, mapuro mararu mBibiliani, kithanlale-aka osoma-mo. Nimosa naya nri mwa Wiisuupulula, kapiitulu 1, versiikulu 17 ni 18; ti vaavo Owo aakhumelenly'awe “Maihi awe ootteela ntoko manri aepwittipwitthi; nto inawu Sawe saari ntoko eporonse.” Vano nto kintthuna-tho wira murowele, mwa aBibilia anyu, aRooma 8:11. Miyo kithanlale, voosiis'ula, mapuro mararu wira kisome, mwa Soolempwa Soowaarya, wa Mutthaka aka olelo, Apwiya ahenlyaya vamurimani vaka mwaha wa ohihimuwa nno. Vano nto kintthuna wira nukhunle, nave-tho, Marku 16:1 ni 2. Vaavo kinookumiha yawaka—yoohimya aka.

<sup>20</sup> Vano mwa Wisuupulula 1:18, hiyo ninsoma Masu ala, 17 ni 18.

*Nto miyo vaamonale-aka, kaahimorela munawoni mwawe kinakhala kirimookhwa. Nto owo aahikiixaatherya ntata nawe noolopwana, onakileela wira, Muhoove; maana Miyo ka oopacerya ni ookiserya:*

*Miyo ka ole onkhala, ni kaahiiwiwa; nto, vano, kookhala voohimala-tho, Amen; ni kookhalana ihulelo sa mookhwaani ni omooroni.*

<sup>21</sup> Ni mwa aRooma kapiitulu 8 versiikulu 11, ninsoma so.

*Nave vakhala wira Erooho awe ole omuhihimunxe Yesu mwa'alipa-ookhwa enkhala mwa nyuwo, yoowo-tho omuhihimunxe Kristu mu'alipa-ookhwa onoovaha ekumi irutthu sanyu sinkhwa ni Erooho awe enkhala mwa nyuwo.*

<sup>22</sup> Nto vano mwa Marku kapiitulu 16, kapiitulu ya ohihimuwa, kapiitulu 16, versiikulu 1 ni 2.

*Numala ovira esaapatu, Maria a oMatala, maama . . . ni Maria mai awe Yakopo, ni Salome, yaahiruwa makhura oowunkhela, wira erowe yamuttikitthele.*

*Nto oxaka-ene voosiisu nihiku noopacerya na esumana, awo yaahirowa omahiye nikhumaka nsuwa.*

<sup>23</sup> Vano, yoosoma aka voosiis'ula, kintthuna kikuxe mwaha wa yoosoma: *Ti Okhuma Wa Nsuwa*. Ni wa nisomi, kintthuna kirumele, “Owerya woovaha ekumi.”

<sup>24</sup> Vano, moosuwela, khino nyuwo munnimwiiwaka raatiyu ni arumeyi oohiyana-hiyana olavula. Nto Munn'ihu Neville oottittimiheya voosisi'ula alavulaka mwaha wa Paasikha, mwaha wa ohihimuwa. Nto miyo kaahuupuwela wira khino kaamukuxa e—ephiro yoovirikana vakhani, kahi wira kikhale oovirikana, masi waacererya-tho vakhani, khino mpantte mukina, wa nyuwo. Soolempwa, khula mpantte onrowaanyu ni Soolempwa, kweekwe sinimuhimya Yesu Kristu. Khimukhanle okhumaka mwa yeeyo, mwa hata enamuna. Kweekwe sinimuhimya Yoowo.

<sup>25</sup> Vano, ntoko olumwenku olelo mwa mu—muteko wa muupuxeryo, wala, mano, Estadu Unidu ni epantte ela ya elapo ya vathi, voosisi'ula, mukereja ni mapuro othene, antthapela muupuxeryo wa—wa oxintta wuulupalexa mutthu otonko awe okhalana.

<sup>26</sup> Miyo kinoona wira, ntoko Moopoli okathi Owo okhwiyaawe, wala ntoko mwanamwane okathi oyariwaawe, Owo khaakhanle okhalaka mu ehikhanle wira aahirwa mulaponi. Nto okathi Owo okhwiyaawe, vekeekhai Owo ooliverya itampi sahu. Masi, nnakhala vo, aakhala anamwane anci-ene ooreera ayariwe, ni annikhalaka atthu anci-ene atonko ohaawa ni khukhwa mwaha wa niwoko n'eekeekhai, masi khonakhaleke mmosa aawenrye ohihimuwa mpakha nihiku nla.

<sup>27</sup> Vano, okhalaka wira ela esumana yuulupalexa mwa wahala, otthapela wuulupalexa wa okathi wothe, Paasikha ola ti vatthu Owo oonihenryaawe etthu Owo aahimyaawe. Mutthu onoowerya ohimya itthu, masi nnakhala vo kahi etthu ekhanle waaminiwaka, voomalela, mpakha yooniheriwe okhala Ekeekhai. Ni okhala wira ti Muluku, Ole iirale, “Nweheke itthu sothene; muthanleke sooreera,” Owo khaarowa wooleelani wira mwiire etthu Owo ahaarowaawe wira Mmansawe. Tivo Owo aahooniherya wira Aari pani ola okhwenle itampi sahu.

<sup>28</sup> Nto, vano, kahi wira ti nihiku na muupuxeryo paahi, wa maluwa ala othene maalupale a Paasikha, ni ixapheyo sa Paasikha, ni anamarokolo a roosa, ni sikina, hiyo niikelin'haahumo, etthapelelo yoowaarya; yeeyo ekhanle saana, masi ela kehiyo etthu y'eekeekhai mwa enamuna yeeyo.

<sup>29</sup> Ntoko atthu olelo antthunaaya ohimya wira, “Naahaana orapiha inawu emaara emosa khula mwaakha, na—Namaxexe, ni Namathanu naahaana waakhela ekomunyawu,” ni miixuttiho sothene soohiyana-hiyana sa . . . Awo annivaanyihana khama naahaana okhala nihiku *nla* wala nihiku *nle*, wala khama naahaana okhala nihiku n'esaapatu wala nihiku noopacerya n'esumana; wala . . . Itthu iya sothene khasihiyo etthu woohikhala elimalelo paahi. Mureerelo xeeni saarowaaya okhala, wira munnimutthapela Kwareesima wala khamunimutthapela Kwareesima, ehikhanle Ekumi mwa

nyuwo? Eyo eyuupuxeryo paahi. Yeeyo, ehikhanle hat'etthu ya nthowa ni yeeyo, masi awo vekeekhai arookhalihaxa ilimalelo saya, masi aroohiya etthu yoothhoneyaxa.

<sup>30</sup> Satana khoncala moota xeeni mukhanlyanyu natiini, wala moota xeeni mury'anyu naxariya Mmwiixuttihoni mwanyu. Mwavyonyaru ophwanya Ekumi iyo, khamunrowa owela, mwa hata enamuna. Khivancala moota xeeni mukhanlyanyu natiini, oreera murima, ikereja kavi mwiirale-anyu mpantte wala munrowaanyu wira, khiyaavo hata emosa erina maana vahikhanle wira munooyariwa vasya.

<sup>31</sup> Tivo, vakhala wira Muluku oomuhihimuxa Yesu mw'alipa-ookhwa, Owo omuhihimuxenrye muupuxeryo paahi? Nto voosiis'ula wa ohihimuwa ti paahi ni—nihiku nimosa mwa eyaakha, wala nihiku nimosa nintthapelaahu yeela? Wala, hiyo ninnittottela muraarelo ohihimuwa Wawe? Eyo enihimya exeeni wa miyo? Eyo enihimya exeeni wa nyuwo? Vano hiyo ninnaamini, mwaha wo waamini, wira Owo oohihimuwa mw'alipa-ookhwa, masi exeeni erina naata ni miyo? Iyo saari iyaakha ikonto piili sivinre.

Vano wira kiphwanye yoosoma ela!

<sup>32</sup> Okhala wira kaahikhulumuwa, moonoo aka okiwereyaka, mwaha wa ixasawu nfurumeera okihomme-awe. Wira, kirowe ilapo s'okhopela vano, ntoko sinsuwelaanyu, muhina mwa mahiku vakhani, nto kaahaana okhalana ixasawu iya, mwan'aka ni miyo. Nto ni koolera, ettekuxa ya ncano, ni sothene, kaahikhulumuwa vakhani, saanikiwereya vakhani. Yeeyo, Kesari ontthunaawe wira mukhalaneke ixasawu iya muhinatthi orowa elapo ekina. Ni Owo ohimye wira, "Munvaheke Kesari ele ekhanle ya Kesari, masi nto munvaheke Muluku ele ekhanle ya Muluku."

<sup>33</sup> Nto kikilaanthe-ene vaavo, kuupuwelaka etthu kaarowaaka ohimeerya muthukumano ola waalipelela voosiis'ula; yoowo onxukhurelaaka saana, ni alopwana n'athiyana yaarowa ovaha ekumi aya mwaha wa etthu mwaarowaanyu ohimya. "Kinrowa wira sayi? Kinrowa okuxa exeeni ntoko yoosoma?"

<sup>34</sup> Vano nto kikilaanthe-ene vale, kihalelaka orupa, mukhora aka khunathukumela, ohoodo wa empa. Khaavo aakhanle iwe woohikhala yoomi, mpakha vansuwelaaka. Miyo khwiiwa. Nkiiwale saana. Nuuvira okathi vakhani, mukhora wa musaala, mwemmo onvolowaaka wira kosomeke, waanithukumela, ni aahikhala mutthu aattikinya mukhora. Nto miyo—miyo khurowa vamukhora khuhula mukhora, nto, otuthuwa waka, mwa—mwa—mwaaruusi, ooreera, a maihi a ncano, a maitho ooripelela eemeanle vale, aakhala ntoko ethutu ekhaani ya Paasikha; okilaaanthe wa okiwehaka naanaano va.

<sup>35</sup> Owo khukinnya ettikitti. Nto yaari e . . . Vekeekhai, kinoona wira kaphiya owaani sinookhala ittikitti sa Paasikha, ni sikina;

masi ela yaari emosa, kaakhenlyaaka, kihikhanle owaani. Nto owo khwira, “Munna Branham, ela ti y’atithi aka ni miyo.” Owo aathuna okupali wira “miyo” yaari mwa yeeyo. Nto atithi awe oowiipa makhonyokhonyo, ari-ene vakhaterani va iroota, yaarooveeleliha ettikitti ela. Vakuxale-aka ni kimuxukhuru mwanamwane owo, varukununwe-awe khukhuma vamukhora, miyo kitthukula ettikitti eyo.

<sup>36</sup> Nto ele yaari vattikittini yeela kikumin’haaka-vo yoosoma aka. Maana, vattikittini aari Marku Oowaarya 16:1 ni 2, okhuma nsuwa, nsuwa naamukhuma. Vano kaahuupuwela yeeyo, vano nto mwaha wa “ovahiwa ekumi,” wa Yesu Kristu wira ahihimuxiwe mw’alipa-ookhwa, kikumiha mwah’aka.

<sup>37</sup> Vano, nsuwa, wookhumani wa nsuwa. Ahe, waahikhala okathi olumwenku waaryaaya mweepiphini yoomalela. Khiwaarina mukhalelo, ni khiwaakhanle etthu. Ni wothene waakhuneeliwe ni maasi, ni waaphwanyaneya vale mooriiipela, wa muttutthi, mukhalelo wa ewiriphi. Nto Erooho ya Muluku yaaniviravira vasulu va maasi ale, khwira, “Okhale okokola.” Muluku aahikhalana niwoko no wira yeeyo, okhala wira vathi va maasi ale yaari ipyo Owo aanle-awe, ni saanitthuna waarya iwo wa nsuwa wira sikhale sikumi.

<sup>38</sup> Nto Waarya woopacerya otonko ovahiwa elapo ya vathi yaari Masu a Muluku oolavuliwa. Waarya woopacerya otonko waaryela elapo yaari Masu a Muluku oolavuliwa. Owo iirale, “Okhale okokola,” vano okokola waahikhala. Eyo yaahirukunxa epiphi khukhala waarya, wira ekumiherye yoopattuxiwa ya ohakalala ni ekumi elapo ya vathi. Vano, Erooho ya Muluku, okathi Eyo yaaviraviraaya ni ophenta ni omoriwa ikharari, ni nihiku nle nuulupale, nihiku noopacerya nooxa wa yoopattuxiwa elapo ya vathi; nsuwa naahikhuma khumwaleya sothene, mirayi saya, khuumiha maasi a mulaponi, khupaka mukhalelo osulu. Nto, emaara aya yoopacerya, naari wira niruuche ohakalala ni ekumi elapo ya vathi, mwaha wa epyo. Owo waari okathi muulupale.

<sup>39</sup> Masi, oh, khayaari etthu, okhuma iwo wa nsuwa, ntoko okhuma wa nsuwa voosiisu ule wa Paasikha. Okathi ula, ni nsuwa niwelaka osulu, nookumiherya okhuma wuulupale wa nsuwa nihinatoko aya; okhala wira saahirwa ihapari suulupale ni okhuma nno wa nsuwa, ovikana okhuma wa nsuwa wopaceryani. Okhuma nno wa nsuwa waahiruuha ihapari, wira, “Owo oohihimuwa! Owo oovahiwa ekumi okhuma mw’alipa-ookhwa, siiso Owo saalahenryawe. Owo oohihimuwa mw’alipa-ookhwa.”

<sup>40</sup> Emaara yoopacerya nsuwa nikhumme-aya, mwa Maphattuwelo, nlo naaruuha mutthaka wira yaamukhala ekumi elapo ya vathi, ekumi enookhwa.

<sup>41</sup> Masi okathi ula, okathi nsuwa nikhumme-aya, waari o—okhuma wa nsuwa vaili; nikina, Mwaana, akhumaka. Yaari e. . . n-s-u-w-a paahi nikhumaka, aari M-w-a-a-n-a aakhumme wira aruuhele Ekumi Ehinimala Epyo yothene yoolaiheriwa ya Muluku yeeyo mwaha wo osuwela khalayi ene Owo oonne-awe wira yaari elapo ya vathi.

<sup>42</sup> Siiso ntoko e—ekumi ya miri yaahaaweryaaya okhala wu wopaceryani nihikhanle n-s-u-w-a wira niruuhele ekumi; siiso-tho, olole, okathi aana a Muluku akhanlyaya elapo ya vathi, onthuneya Waarya wa M-w-a-a-n-a wira waaruuhele Ekumi Ehinimala, Ale oothanliwa Awe Owo aasuwenly'awe ohinatthi opattuxiwa olumwenku. Owo aahaathanla mwa Yoowo ohinatthi opattuxiwa olumwenku.

<sup>43</sup> Nto voosiisu wa Paasikha, nto, epantte emosa ya etthaya ela saaphwanyaneya irutthu sahu okathi ene yoowo, okhala wira hiyo na etthaya ya vathi. Nto Wirimu, yaahikhala Eliivuru ya muupuxeryo, ni mikhalelo Sawe saari mwa Yoowo, osuwelaka wira okhala wira Mwaana a Muluku ola aahihimuwa, Ela yaammuhihimuxerya Ekumi khula mwaana aatthomeliwe okathi ula muulupale. Owo aahisuwela wira yaamukhala siiso. Ni ovuwaxa xeeni wa okhuma nsuwa waari ole ovikana ole wopaceryani, okathi waapacenryaya oxa!

Vano, oxa nno wuulupale wa Ekanyeryo ya Paasikha!

<sup>44</sup> Vano, olole nookhalana ekanyeryo ya Paasikha, a elapaha. Atthu anniveleliheryana ihapari, mmosa ni mukhwaawe, ni wira ekhaliherye ekumiheryo ela yuulupale ya musurukhu wala ekampaanya, wira mameetiku ni siyensiya a mameetiku avarele muteko etthu, wira evukule wala ekhaliherye mwaha wa elapaha. Iyo ekanyeryo, ele eniithanaahu ekanyeryo ya Paasikha, okathi onveleliheryanaahu mutthaka mmosa ni mukhwaawe. Masi naakhelaka mutthaka, ekanyeryo eyo ti yootaphuliwa, okhala wira ekanyeryo t'ile erina mutthaka wootthukiwa muhina.

<sup>45</sup> Nto vano, Ekanyeryo y'ekeekhai ya Paasikha, ni okhuma nno wa nsuwa, yookheriwa; ni esiiri y'Ekumi nuumala okhwa ehupululiwa. Okathi owo ohinatthi, hiyo khinaasuwela. Olumwenku weetta mweepiphini, voohoona, waanyiherya wa mutthu. Iyuupuwelelo saari eriyari mmurimani mwa mutthu, ilimalelo saahipakiwa. Atthu yaakokhorela amuluku eethiru. Awo yaakokhorela nsuwa. Yaakokhorela inamuna sothene sa amuluku. Ni inamuna sothene sa atthu yaahimya itthu, awo othene amalenle mmahiye, ni akhanle mmahiye.

<sup>46</sup> Masi Ekanyeryo y'ekeekhai yaahitaphuliwa, nto Ole aatonko okhala ntoko hiyo sinkhalaahu, aakhwiye ntoko sinkhwaahu, khuhihimuwa mw'alipa-ookhwa. Voosiisu xeeni! Khonakhaleke omosa ntoko yoowo, mwa wahala othene a olumwenku. Esiiri yaahisuwelihiwa wira Owo aari ohihimuwa ni Ekumi.



47 Ni Owo iirale, okathi Owo ohihimunwe-awe voosiis'ule, "Okhala wira Miyo ka mukumi, nyuwo munookhala akumi nave." Kahi wira Owo t'okhanle paahi namattottela murareelo ohihimuwa, masi Epyo ele yothene yaamumula mwa natiri muulupale a Muluku yaari namattottela murareelo ohihimuwa iwo okela mw'Ekumini. Okhala wira, Owo ohimnye wira, "Okhala wira Miyo ka mukumi, nyuwo munookhala akumi nave." Iwo waari otaphuliwa wa Ekanyeryo. Okhala wira Owo aahiruhiwa, siiso khula mmosa ori mwa Kristu onooruhiwa vamosa ni Yoowo.

48 Mwa okhuma nno wa nsuwa woovuwa, Muluku aahooniherya, ahiiso olipiherya, Masu Awe. Epiphi yothene ni ohoverya waakenle mmuupuweloni mwa atthu wookumihiwa, okhala wira va aari Ole aatonko okhala, olya, owurya, ni opatthana n'atthu, iirale, "Kihaana owerya w'ovaha ekumi Aka; kihaana owerya wo okuxa-tho." Nto vano kahi wira Owo aahimnye nuulumo nlo paahi, masi Owo aahooniherya wira yaari Ekeekhai. Oh, etthu xeeni yoovuwa ekhanle eyo!

49 Miyo kookupali voosiis'ula wira hata hiyo, ninaamini, khaninwerya osuwela saana etthu xeeni yuulupale yaari iyo. Okhala wira Owo oohihimuwa mw'alipa-ookhwa, hiyo-tho noohihimuwa mw'alipa-ookhwa, maana hiyo naari mwa Yoowo.

50 Nwehe vano. Epiphi yaakhuneela elapo, ni ipyo khisaakhanle okhalaka n-s-u-w-a nihikhumme, ni epiphi yaahikhuneela elapo. Nto vano M-w-a-a-n-a aahihimuwa, epiphi yothene yaahilakaseihiwa ni Waarya nno, okathi waamwareelaaya mulaponi, w'atthu, wira, "Owo khokhanle mu, masi Owo oohihimuwa!" Nu—nuulumo xeeni! Owo aahooniherya Masu Awe. Owo aahooniherya wira Awo yaari, yaari ekeekhai, maana Owo vano aahixintta okhwa, omooroni, ni mahiye.

51 Oraaru wa xetwani: okhwa, omooroni, ni mahiye; okhala wira Satana ti mwaneene okhwa, owo ti mwaneene omooroni, nave-tho mahiye. Ni owo waari oraaru wa Satana, okumiheriwaka ni etthu emosa, waari okhwa. Okhwa, munrowa mmahiye; ni muryeene natampi, munrowa omooroni. Yothene eryeene etthu emosa, oraaru wa Satana, yoowo waari okhwa. Waamukhalinhe mutthu mw'epoththani miyaakha iya sothene.

52 Masi vano oraaru w'ekeekhai wa Muluku, oryeene Ole woowooniheriwa mwa Kristu, Yoowo aari Ekumi, ni waataphunle Ikanyeryo khimuxintta nwanani, kuhihimuwa, Muluku mmosa eekeekhai ni mukumi. "Miyo ka Ole kaakhwiye, nto kinkhala voohimala-tho, ni kookhalana ihulelo sa mookhwaani ni omooroni." Muluku, akhalaka Mmosa, oowiiipaka Mutthu, aahikhala ni hiyo, khimuxintta khula nwanani. Ni khooniherya wira oraaru wa Satana waahixinttiwa, ni wira oraaru wa Muluku waahisuwelihwiwa, okhala wira

Muluku paahi taarina owerya w'oruuha-tho Ekumi. Owo aari Emanuweli. Muluku aahiisooniherya mw'erutthuni.

<sup>53</sup> Khivanxankiha Owo aawery'awe ohimya vale, Matewu kapiitulu 27, "Koovahiwa owerya wothene Wirimu ni vathi. Miyo kinoorumani okhala anamoona Aka, a olumwenku wothene." Owo aahixintta okhwa, omooroni, ni mahiye. Kahi wira Owo iirale yeeyo paahi; ni ookhuma, ooxintta, n'uwerya wothene Wirimu ni vathi. Othene ale yaari Atithi, yothene yaari Erooho Yoowaarya, ni sothene sitonko okhala, saari mwa Yoowo. "Koovahiwa owerya wothene Wirimu ni vathi." Itthu sothene sikina khasirina owerya. Owo aahixintta.

<sup>54</sup> Vano! Vano nto, kahi yeeyo paahi, Owo aahiveleeliha Masu wa awiixutti Awe, waamini Wawe. "Muhoove, maana Miyo ka Ole kaakhwiye, nto kinkhala voohimala-tho. Ni kookhalana ihulelo sa mookhwaani ni omooroni; kooxintta. Muhoove-tho, okhala wira khula Epyo yookhalihwiwa khalayi ene yoothommwa ya Muluku enookela mw'Ekumini okathi Waarya iwe ommwareelaaya elapo yothene, wa Ehapari yooreera yoovuwa. Mwa khula okathi, Eyo enookumiherya ohepha Muluku otthokihenry'awe Yeeyo." Owo aahihimuwa mw'alipa-okhwa.

<sup>55</sup> Oh, moota ekhanly'aya etthu yooreeraxa, "Miyo ka mukumi, wala koovahiwa ekumi." Nuulumo nnihimya, nuulumo *ovahiwa ekumi*, nuulumo n'Ekereku nnihimya wira etthu "ekhalihwiwe ekumi nuumala okhwa."

<sup>56</sup> Ntoko e—epyo enkela mutthayani, ehaana okhwa, epyo yothene voomalela. Ehaana wuntta, epyo yothene voomalela. Ni ekumi yothene, yaari mw'epyonni, ehaana okhumela-tho.

<sup>57</sup> Owo aahivahiwa "ekumi." Kahi yeeyo paahi. "Ni kinooveleeliha Ekumi yeeyo ekivanhe ekumi Miyo, Owerya okikuminhe Miyo mmahiye, kinimooveleeliheryani Yeeyo nyuwo, wira yoovaheni ekumi, wira vankhalaaka nave-tho nyuwo mukhale vaavo."

<sup>58</sup> Mwa Luka, kapiitulu 24, versiikulu 49. Owo iirale, "Moone, Miyo kinimoorumihelani natiri a Atithi; masi nyuwo muhaleke, wala mulipeleleke, mpooma mwa oYerusalemu, mpakha waakhela Owerya okhumaka Wirimu." Wira oniherye wira kahi Yoowo paahi aaphwannye muraarelo wothene wa yeela, masi Owo ookawanya miraarelo iyo.

<sup>59</sup> Owo aarwenle ovuluxa, ahiiso oruhela Ekumi, Epyo ele yoothommwa Muluku oonale-awe ohinatthi opattuxiwa olumwenku khuhela masina aya Muliivuruni mw'Ekumi. Nto va awo yaari mulaponi, ehirina nrromelo; Owo aarwenle kahi wira akhale Eparakha paahi, masi okawanya Eparakha ni Epyo yothene yoothommwa. Vano, vakhala wira Epyo yahaakhanle mulaponi, khivaaweryaneya okhala ekumi. Yaahaana okhala mulaponi, ni ophuwihiwa. Voohicala okathi

xeeni ekhalihwaaya mweepiphini, Eyo enoophuwa okathi M-w-a-a-a-n-a onaaryelaawe. Nwehe vano, Owo aarwenle okawana Yeeyo ni hiyo.

<sup>60</sup> Khivanxankiha Ehapari yooreera okhalaka mihupi sooreera. Nuulumo *Ehapari yooreera* nnihimya “mihupi sooreera.” Mihupi sooreera, exeeni? Mutthu anikhwela vale, iyo mihupi sooreera. Vakhala wira Kristu ooyariwa iyo mihupi sooreera. Masi khasinakhaleke mihupi, khasinakhaleke mihupi ntoko mihupi iya, wira, Ole ommanne natiri oommaliherya natiri, wira, “Owo ookhala voohimala-tho, ni ookhalana ihulelo sa mookhwaani ni omoroni, mmatatani mw’Awe.” Epiphi yothene yaahimalihiwa. Khiyaakhanle-tho epiphi wira yooniwe, okhala wira Mwaana aahikhuma mmahiye. Khiyaakhanle, “Ahe, Owo onimoorwa, wala Owo khino onimoorwa.” Owo aahirwa, Ehapari yooreera, mihupi sooreera!

<sup>61</sup> Nwehe, Mutthaka ene wa Ehapari yooreera, Yoowo ene, ti owooniherya atthu wira Owo oohihimuwa. “Murowe mwaahimeerye awiixutti Aka wira Miyo koohihimuwa mw’alipa-ookhwa, ni kinookumana n’awo, wira kaalipiherye yeela.” O Muluku, moota nihiku nla nookiserya onrowaaya okhala-tho Waarya mulaponi mothene! “Nto Miyo kinoowooniherya awiixutti Aka! Murowe mwaahimeerye wira Miyo nkihiyo ookhwa, ni nkihiyo elimalelo, masi Miyo ka Kristu mukumi. Kinookumana ni yaawo. Mwaaroihele Mutthak’ola awiixutti Aka, wira Miyo koohihimuwa mw’alipa-ookhwa,” Ehapari yooreera, mihupi sooreera.

Nyuwo muniira, “Eyo ekeekhai?”

<sup>62</sup> Aheperi 13:8 ahimye wira, “Owo mmosaru nsana, olelo, ni mahiku othene.” Hiyo, anamuttottela muraarelo Awe, nihaana wooniherya Ekumi Awe vano enkhala mwa hiyo, anamattottela muraarelo Ekumi yeela. Ekumi, khenakhaleke ekumi yookhaliwa ntoko yeeyo; Owo aari Mwaana a Muluku. Vano Owo khukhwa, nto ni yeeyo khuttipha; masi okathi Owo ohihimuwaly’awe mw’alipa-ookhwa, voosisu wa Paasikha, nto hiyo, ntoko arumeyi Awe, noorummwa ni Yoowo wira nirowe mulaponi mothene ni nimuroihele ihapari iya sooreera khula mutthu, wira Owo mukumi. Ni ninwerya sayi hiyo wira ni Masu paahi? Maana yoolepwa, “Ehapari yooreera kherwiiye ni Masu paahi, masi ni owerya ni wooniheriwa wa Erooho Yoowaarya, wira yooniherye wira Owo ookhala.”

<sup>63</sup> Vano, yaakhanle-ene ehapari ekina, ntoko Paulo saahimenryaawe nimosa wa makhuru, “Nkireere otikinihiwa wira murukunuwenle ehapari ekina.” Vaavo vahikhanle ekina, masi ehapari epakeliwe, wa ehantisi ya muromolelo, muhiyaka mihupi sooreera.

<sup>64</sup> “Nto okhala wira miyo ka mukumi, nyuwo munookhala akumi nave. Ni Miyo kinkhala mwa nyuwo, ni miteko

Miyo sinvaraaka,” Yohani 14:12, “miteko Miyo sinvaraaka sinookisuwanyeiha Miyo mwa nyuwo.” Mutthaka xeeni! Khivanxankiha, sinkhalanakaahu olumwenku w’epiphi wa teyoloxiia, masi okathi wa makaaripi onimoorwa-tho Warya. Onookhala ohihimuwa okathi wa makaaripi. Onookhala Waarya okathi wa makaaripi.

<sup>65</sup> Vano, ekhalelo ene ya Mutthaka oveleelihiwe, wira, “Owo oohihimuwa mw’alipa-ookhwa,” hiyo anamattottela muraarelo Awe, hiyo ninkawana ohihimuwa ni Yoowo, ninkumiha muraarelo mwa yeela, nooniheryaka olumwenku wira Owo mukumii. Khanikhanle wiiraaka ni moolumo paahi. Khanikhanle wiiraka ni elimalelo ya mutthu. Hiyo ninooniherya vekeekhai ele ninthoonyaahu.

<sup>66</sup> Kinnoova olelo wira anci-ene a hiyo khanweettiherya athu wa Kristu. Ninweettiherya okereja, eyuupuwelelo. Masi nihaana oweettiherya wa Kristu. Owo ti Mmosa paahi, ni Mmosa paahi orina Ekumi. “Ole orina Mwaana ookhalana Ekumi.”

<sup>67</sup> Nto ekumi ya mutthu okhwiye yooniheriwaka mwa nyuwo, munookhala ekumi emosaru owo aakhalaawe.

<sup>68</sup> Ephome ya mutthu yaari mukhalelo khata wa ephome, vano nyuwo khukuxa ephome ya mutthu mmosa khurukunxa ephome ya mutthu uwo mwa ekina, owo tthiri aamukhala a mukhalelo yoole wa ephome.

<sup>69</sup> Ni erooho eri mwa nyuwo yasuweliwa ntoko yookhwa, nto nyuwo khuttikittheliwa ni Ekumi yaari mwa Kristu, khunakhala mwa nyuwo! Arooma 8:11 ahimye wira, “Vakhala wira Erooho emuhihimunxe Kristu mw’alipa-ookhwa, enkhala mwa nyuwo, Eyo enoovaha ekumi erutthu anyu enkhwa,” Ekumi emosaru yeeyo, owerya omosaru, ni miraarelo imosaru, Owo aarinaawe mulaponi muumu, sookhuma wa Muluku. Owo ohoovuluxani, Epyo yaasuweliwe khalayi ene ni Muluku, ale masina aya aheliwe Muliivuruni mw’Ekumi ya Mwaapwittipwitthi ohinatthi opattuxiwa olumwenku.

<sup>70</sup> Nto Waarya iwe wa Ehapari yooreera ya ohihimuwa, olipiheriwa wa Masu! Ninsuwela sayi wira Owo aari Kristu? Okhala wira Owo aahooniherya etthu Owo aahimme-awe. Kinrowa osuwela sayi Mutthaka w’okathi? Muluku onnooniherya etthu Owo aahimaly’awe, ni Owo onnilavula yeeyo. Iwo p’usuwanyeihiwa, wira hiyo n’anamattottela muraarelo ni Yoowo woohihimuwani. Owo onnooniherya etthu Owo ohimme-awe.

<sup>71</sup> Etthu Owo aahimaly’awe wira mwa Kristu, Owo aahooniherya woohihimuwani. Etthu Owo aalaiheryawe wira mahiku a Moise, Owo aahooniherya. Etthu Owo aalaiheryawe mahiku a Enookhi, Owo aahooniherya. Mahiku othene a arummwa, Owo aahooniherya eyo.

72 Vano nihiku nla, Owo onnooniherya ele Owo ohimmye-awe, okhala wira awo epanthe ya Epyo ele yaathonyeriwe Muliiwuruni mw'Ekumi wira Owo aarwenle ovuluxa-tho otthikela wa Muluku. Oh, Mutthaka xeeni!

73 Voosiisu wa Paasikha, kahi wira aahihimunwe Yoowo paahi, anamuttottela muraarelo Awe yaahihimuwa ni Yoowo. Owo. . . Awo yaari mwa Kristu wookhomeliwani Wawe vamwiikimanyo. Awo yaari mwa Yoowo woohihimuwani Wawe. Hiyo n'anamuttottela muraarelo Awe, oovahiwa ekumi nimanlene okhwa mweepiphini.

74 Olumwenku wa epiphi wo ohaamini, mwemmo ikereja ni miromolelo, ni sikina, saanikhalannaya-mo. Ni yookhala etthu mwa hiyo eniitthana, "Oh, hiyo nimmuthuna Muluku! Hiyo ninvoliwa etala ni ntthona mwaha wa Muluku." Hiyo naaitakanxa ni aMetotista, aPatista, aPentekosite, maPrespiteriyaano, n'akina-tho, ni nlelo yaahikhala etthu yoovonyeya, hiyo tthiri khinaawerya ophwanyaya Eyo nlelo. Nto naanaanoru, okathi waapapelaahu mweepiphini, ohihimuwa wuulupale khunirweela mwa wooniheriwa wa Masu oolaiheriwa a Muluku.

75 Ntoko, Owo aari wooniheriwa wa Masu oolaiheriwa a Muluku. "Miyonkinihiya munepa Awe mookhwaani, nnakhala nkinimuhiya Oowaarya Aka wuntta." Owo aahooniherya Eyo, khula Masu a Muluku aalaiheriwe Yoowo. Owo aahooniherya okathi ohihimunwe-awe voosiisu wa Paasikha.

76 Vano, ale yaatonko waapapela mweepiphini ni ehisuwelaka, vakhala wira yaahaana orapiha inawu nihiku nla, wala vakhala wira yaahaana osuka nihiku khata, wala otthara sooruma khata, itthu iyo sothene soovira. Tthiri, waahikhala ohihimuwa woovuwa ovirikanye khula etthu yoopakiwa ni mutthu otonko awe wira, waanyiherya wothene woopakiwa ni mutthu.

77 Khaatonko okhala, mpakha okathi yoowo, mutthu aawerya ovaha ekumi awe ni okuxa-tho. Owo ooxira eyooniheryo ele ya siyensiya awo yaarinaaya, mwaha wo ohihimuwa.

78 Awo yaairaka, wira, "Yesu Kristu kahiyo mmosaru nsana, olelo, ni mahiku othene," wira, "Owerya Wawe kuhiyo omosaru," wira, "Ehapari awe kehiyo emosaru," okathi Bibilia onihimyaawe wira Eyo emosaru! Muluku ooxira khula muromolelo, khula eyaaminelo, vano Owo ookelela ohoolo ni Erooho Yoowaarya Awe, ntoko Owo saahimme-awe, ni oonooniherya, wira Owo mukumii.

79 Hiyo n'anamattottela muraarelo ohihimuwa Wawe, nivahiwe ekumi nimanlene okhwa molumwenkuni, mutampini ni sootakhala. "Owo oonivaha ekumi vamosa ni Yoowo, anihimuxaka ni Yoowo, vano nikilaanthi mapuro a Wirimu mwa Kristu Yesu." Owo oniruuha. . .

<sup>80</sup> Erooho Awe enniruuha-tho Ekumi Awe yeeyo elapo ya vathi. “Erooho ya Muluku, emuhihimunxe Kristu,” erutthu, erutthu yoottikittheliwa; vakhala wira Erooho ya Muluku yaahitikitthela erutthu ele mwa enamuna emosa wira, okathi Epyo eyo emorenyaya mulaponi, Owo khaarowa omuhiya omumula iwe. Nnari. Owo aahinvaha ekumi ni khimuhihimuxa. “Erooho emosaru yeeyo,” ni miteko imosaru, ni Owerya omosaru, ni ithoonyeryo imosaru, “yakhala-ru mwa nyuwo, Eyo enimooihimuxani nave-tho.”

<sup>81</sup> Kaatthuna koosomeleni Yoolempwa yaamukhaani va. Kaatthuna wira mukhunle Yoolempwa ekina kilempe aka va. Pooti wookhaliheryani vakhani. Emphwanyaneya Muliiwuruni mwa Onamukuttho, kapiitulu 23, versiikulu 9 mpakha 11. Nwiriyanane saana. Mwa ikano, ikano sa aLevi, Muluku alavulaka ni Moise. Nwiriyanane. Itthu iya sothene ithoonyeryo vano, ni ninrowa omalela vaava okathi vakhani wira nikele mwa ethoonyeryo ela.

*Vano APWIYA yaahimuleela Moise, yiraka,*

*Mwaahimeerye aana a Isarayeli, mwiire, nyuwo . . .  
mwaphiya elapo kinoovahaakani, . . .*

<sup>82</sup> “Nipuro, voopuroni, koovanhe-akani. Vano mwaaleele aana a Isarayeli, wira mwaphiya nipuro nla khata miyo koolaihenry’akani wira kaamooroihani, nyuwo mwaphiyaru iwe muttetthe yoola.” Vano olavula veephattu va, ethoonyeryaka ya erooho.

*. . .okathi wo ohepha ipyo sanyu (mwaakhenle  
kooihimenryaakani), vano nyuwo mmuroiheleke  
namukuttho ehupu yoopacerya ya soohepha sanyu:*

*Nto owo onoohakhinya ehupu eyo ohoolo w’APWIYA  
wira mwaakheliwe nihiku noottharana nuuvira  
Esaapatu namukuttho onoohakhinya.*

<sup>83</sup> Naakhanle niira noowaarya, naahaana opakiwa nihiku na esabath, nenlo naari nihiku na neethanu nenli na esumana, nenlo nikhanle Saapatu. Masi nyuwo mooweha, mwa muupuxeryo ola, yaahaana ohakhinyiwa nihiku noopacerya na esumana?

<sup>84</sup> “Ehupu, yaari mulipu wa epyo mwaanle-anyu, okathi emmelaaya khuttokottha, mwaahaana othikila ehupu ela khuroiha wa namukuttho. Ni omutthuniherya owo okuxa ni ohakhinya ohoolo w’Apwiya, wira mwaakheliwe, wira muhaakheliwa. Muhoorwa ni ehupu anyu, nto owo ohaana ohakhinya ohoolo w’Apwiya, o . . .”

<sup>85</sup> Kahi saapatu, nihiku na neethanu neeili; masi nihiku noopacerya, hiyo niniihanaahu Ttiminku, T-t-i-m-i-n-k-u.

<sup>86</sup> Vekeekhai, nlo nu—nuulumo na Erooma, nenlo awo yiihanakaaya nihiku na nsuwa wa muluku a nsuwa. Masi moota erukununwe-aya!

<sup>87</sup> Khanihiyo-tho n-s-u-w-a. Ti n-i-h-i-k-u na M-w-a-a-n-a, nihiku na Mwaana, nenlo enuku ele ya Etriku (oopacerya a Muluku okhumme mw'alipa-ookhwa) ohaana ohakhinyeriwa mthukumano, wira hiyo na Epyo Awe; ni eyo ti yoopacerya ya Epyo y'ale arumpe, enihakhinyiwa nihiku noopacerya na esumana. Ttiminku, Owo aahihimuwa. Khulaiha khuwela Wirimu, ohoolo w'athu.

<sup>88</sup> Nwehe, Yaari enuku yoopacerya ya Etriku ya Muluku yaahihimuxiwe mw'alipa-ookhwa, enuku yoopacerya ya Etriku ya Muluku. Ni Owerya woovaha ekumi wa Muluku, Muluku aahivaha ekumi ekumi Awe, khumuhihimuxa mw'alipa-ookhwa, nto Owo aari Mulipu w'ale yaarupa, Mulipu. Owo aari Ehupu.

<sup>89</sup> Mwaha wa yeeyo awo yaarinaaya ohakhinyaka ehupu, okhala wira yaari yoopacerya ottokottha. Ni yaahakhinyiwe ntoko etthapelo ya omuxukhuru Muluku, yaaminiki wira akina aya yaanvenya. Yaari ethoonyeryo.

<sup>90</sup> Ni, olelo, okhala wira Owo aari Mwaana oopacerya a Muluku oophiyerya ottokottha voomalela, wira akhale mwa Muluku, Owo ookumihiwa elapo ya vathi wira ahakhinyeriwe athu othene. Oh, nisomi xeeni noovuwa! Ni Owerya woovaha ekumi, Oopacerya! Onamwi, Owo aarina—Owo aathoonyeriwe; ni imaara sinci-ene, ntoko sinrowaahu woona ohoolo, wira Owo aahithoonyeriwa. Masi ola waari Mulipu w'ale yaarupa. Owo aahihakhinyeriwa Epyo yoolaiheriwa yaarina natiri a Ekumi.

<sup>91</sup> Owo aahihakhinyiwa Nihiku na Pentekosite, “waarwiiye-aya nsu okhuma Wirimu ntoko ettheke, yoonyakula enoopa ni ikuru,” ni khuhakhinyeriwa athu, athu apentekosite yaari vale oPentekositeni, yaalipelela Eparakha orwa.

<sup>92</sup> Ni wira ohakhinyiwe-tho, ntoko sinsuwelaahu, nihiku nookiserya, voolikana ni Luka 17:30, nihiku na Mwaana emaara ekina, “nihiku na M-w-a-a-n-a a mutthu onrowaaawe wooniheriwa,” wala ohakhinyeriwa-tho athu.

<sup>93</sup> Vano, taani okhanle Mwaana a mutthu? “Wopaceryani naari Nsu, nto Nsu naari ni Muluku, nto Nsu naari Muluku. Vano Nsu nihiipaka erutthu, khukhala ni hiyo.” Nto vakhala wira mwiiixuttiho wothene orinaahu, ni olipiheriwa wa Masu a Muluku; ni Masu a Muluku, ni ithoonyeryo, ni mitikiniho, hiyo ninnoona olelo, wira Muliivuruni mwa—mwa Luka va, nimanlyahu ohimya, ahiiso lu—Luka kapiitulu 17 ni versiikulu 30; ni Malakhiya 4, ni Soolempwa soohiyana-hiyana hiyo ninsuwelaahu, wira Masu yaawo-tho annihakhinyeriwa athu, wira ilimalelo sookhwa sa mutthu sihookhwa, ni Mwaana a Muluku mukumi-tho ni opatiiso wa Erooho Yoowaarya eriyari ahu, ni ennivaha Ekumi.

<sup>94</sup> Siiso ntoko Kristu aaryaawe Ole oopacerya ohihimuwa, mwa maprofeta othene, ni akina; onaamwi oothoonyeriwa mapuro manci-ene, Owo aari Mulipu w'ale arumpe. Mwa

Mwaakameliwa, akhumaka mwa Kristu, onkhuma mukereja, ehaana okhala Ehupu enihakhinyiwa-tho mahiku ookiserya. Oh, wulu!

<sup>95</sup> Ohakhinyiwa wa ehupu! Exeeni yaari ehupu? Ele yoopacerya ottokottha, ele epacenrye wooniherya wira yaari etriku, yoonihenrye wira yaari ehupu.

<sup>96</sup> Aleluya! Kookupali wira munnoona enihimyaaka. Eyo yaahakhinyeriwa atthu. Nto emaara yoopacerya enrowaaya okhala, wa okathi wa Mwaakameliwa, wa ohihimuwa okhuma mmiromoleloni sa epiphi, onrowa okhala Mutthaka, yoowo ottokottha woomalela wa Masu otthinke-aya mwa Owerya Waya woomalela, ni onrowa ohakhinyeriwa atthu, ni ithoonyeryo imosaru ni mitikiniho Owo opakale-awe wu.

<sup>97</sup> “Okhala wira Miyo ka mukumi, nave-tho nyuwo munookhala akumi,” alavulaka ni Mwaar’awe. “Okhala wira miyo ka mukumi, nyuwo munookhala akumi.” Ohihimuwa xeeni waari uwo! Ni ohihimuwa xeeni okhanle ola, ohihimuxiwa mw’alipa-ookhwa, “wira nikhalihiwe akumi mwa Kristu Yesu,” ni Owerya woovaha ekumi wa Muluku!

<sup>98</sup> Owo aahihakhinyiwa ohoolo waya. Masu, yaawo Owo aary’awe, yaahihakhinyeriwa awo Nihiku na Pentekosite, Masu owooniheriwa. Vano, nto ntoko sihimme-aka, anoohakhinyiwa-tho nihiku nookiserya. Vano, mwa nlikanyiho . . .

<sup>99</sup> Nyuwo muniira, “Ahe, vano, nwehererye minuutu mmosa, Munna Branham. Kinnisuwela ekereja e . . .” Ahe, ni miyo, nave. Munnona?

<sup>100</sup> Masi vano, mwa nlikanyiho, anghi—vaakhanle wira naarowa otthikela oTucson oxekuw’ola, vano, ni khula mmosa a hiyo aarina e . . .aarowa ovolowa mu—muCadillac muulupale, musya? Ni ikhatera sothene saapakiwe ni—ni esapala, esapala yoowoolowasa, yoowoolowa ni yookhweya okilaathi-vo; ni moonyakela waari mooreeraxa; eleemi yaari yookhuneeliwa ni niikeli ni yoowarihiwa tiyamante yothene; ni mutooro aya waari wo wehereriwa ni mekaaniku wira okhale mutooro wookikana; ni iroota saari . . .sothene sa rolamento ni soowootihiwa makhura; ni ipenewu saari soohittyuwa ni soohiphutuwa; ni sothene soowehereriwa mwa siyensiya.

<sup>101</sup> Saakhanle wira saammala-ru okhuma mwaapakiwaaya, soopiili, ni soopiili soosarya kasoliina. Iyo ikuru so weettiha, kasoliina, okhala wira mwemmo ori-mo oktaano. Masi vano mwaarowaka opattiha, sinaamwi soopiili sikhalaka ntoko soolikana, masi khukhala emosa aya ehirina ephani-phani, ehirina owerya wo opatta.

<sup>102</sup> “Ahe,” nyuwo muniira, “owerya ori mukasoliinani, Munna Branham.” Masi miyo nkincala owerya kavi ori mukasoliinani; voohikhala wira enookhala ephaniphani vo wira yooniherye owerya iwo, voohikhala wira wookhala owerya



vo wira olupiherye wira owo kasoliina, yaamulikana ni maasi. Mpakha . . .

<sup>103</sup> Hata wira mateyooloku anlavula sayi, oratta xeeni ekereja anyu ekhalihwaaya, osoma kavi orinaanyu, hata enlikana sayi ni Bibilia; mpakha Ehupu iyo yoohakhinyiwa, mpakha Erooho Yoowarya erwe mwa mutthu owo evahe ekumi Masu awo! Kasoliina onthoonyerya Masu. Eyo Ekeekhai; masi, ahirina Erooho, Awo khaneetta.

<sup>104</sup> Hiyo ninoohelaxa elemelelo mwa Mekaanika nave hat'etthu mwa Eyeettiheryo. Ontthuneya Owerya wa eyeettiheryo wa Muluku, Owerya wa ohihimuwa wa Yesu Kristu vasulu wa Ekereja, wira yooniherye ni wiiraneiha wira *Ola* kasoliina. Pooti okhalaka mulaathani mwa kasoliina; nlelo vaamuweryaneya okhala maasi, moone. Masi mooniheryo mmosa paahi, t'ula, ohelela Ekumi ila mwa yeeyo, nto onimooniherya sinto kasoliina wala nnari.

<sup>105</sup> Ni nyuwo mweereryaka ohela Erooho Yoowaarya mmuromoleloni, enoolikana ni weererya . . . Pooti okhalana opuphuruwa; munoononona mutooro anyu, mwaha wo osariha makhala.

<sup>106</sup> Masi, oh, kinnitteeliwa murima okhala wira wookhala Owerya wa oktaano ikonto muloko, Masu a Muluku ni Erooho Yoowaarya wira epattihe, ni ohihimuxa Owerya wa Muluku mw'ekumini mwa mulopwana, wala mw'ekumini mwa muthiyana, wala mukereja. Eyo emusukhumenle Cadillac ole mphironi, vathi va Owerya wa eyeettiheryo wa Eooho Yoowaarya etthinke khuhakhinyeriwa atthu Nihiku na Pentekosite, emukhalihaka Owo mmosaru nsana, olelo, ni mahiku othene.

<sup>107</sup> Vale yaari Ehupu yoopacerya yaakhumme mwa maprofeta othene, yoowo aari Mwaana a Muluku, Mwene a maprofeta othene.

<sup>108</sup> Sinnikhalaka, ikereja, ikereja, amwaakameliwa, amwaakameliwa, ikereja, amwaakameliwa, amwaakameliwa.

<sup>109</sup> Masi ohaana okhumelela Mmosa! Aleluya! Ohaana okhumelela Mwaakameliwa eekeekhai! Ohaana okhumelela Mmosa ohirina Mekaanika paahi, masi Eyeettiheryo ya Yeeyo, enikhaliha Ekereja ekumi, eneetta mwa Owerya w'ohihimuwa Wawe. Nihiphienrye nipuro nenlo, nihiphwanye nipuro nenlo, eniphwanyihani yooreera okuttha ikuupu? Eniphwanyihani yooreera orukunxa mukhalelo wala omukuttha voomalela ehikhanle Eyeettiheryo mwa yeeyo? Khivancala moota xeeni Mekaanika enooniheryaya okhala yoolikana, ehaana okhala Eyeettiheryo wira evarihe muteko.

<sup>110</sup> Ti yeeyo Owo oonihenryaawe! Aleluya! Ti yeeyo Paasikha oonihenryaawe. Owo khaari Masu paahi, masi Owo aari Muluku Mwaneene, Eyeettiheryo, mwa Masu. Yaairinhe erutthu ya

Yesu Kristu (yooriirya, yoolipa, ni yookhwa, mmahiye) wiiattha ekelaka mw'Ekumini khuhihimuwa, ni khupirikixa nliku. "Miyo ka Ole kaakhwiye," ookhwaxa mpakha nsuwa ohimya wira Owo aahikhwa, mweeri ohimya wira Owo aahikhwa, ittheneeri ohimya wira Owo aahikhwa. Ephattu yothene yaahihimya wira Owo aahikhwa. Nto vano olumwenku wothene ohaana osuwela wira Owo mukumi-tho. Owo khaari Mekaanika paahi, Masu a Muluku, Owo aari Eyeettiheryo wira ooniherye.

<sup>111</sup> Nto Owo, oryeene Mutheli, Mwaakameliwa ohaana okhumelela, okhala wira Owo epante ya Yoowo. Ni enweryaneyya okhala paahi woonihiriwa wo omalihiriwa wa miyuupululo sothene ni sikina silavuliwe sa Mwaakameliwa; Enwerya wooniherya paahi. Yaairaka etthu yoovirikana ni Mutheli, owo kahi Mwaakameliwa. Okhala wira, Owo erutthu ya erutthu Awe, nikhuva na nikhuva Nawe; Ekumi ya Ekumi Awe, Owerya wa Owerya Wawe! Owo ti Yoowo! Ntoko mulopwana ni muthiyana ankhala mmosaru, ni muthiyana okumihiwe-ene mpararini mw'awe, Owo aahikuxa Erooho, Erooho y'othiyana, mwa Yoowo. Erutthu mpararini mw'Awe, yoopaka Mekaanika ni Eyeettiheryo, Mwaara. Erooho ya Yoowo ni erutthu ya Yoowo, khuhela vamosa, khupaka Mekaanika ni Eyeettiheryo. Mpakha ekereja wala atthu. . .

<sup>112</sup> Anamarokolo ala othene a Paasikha, ni meera, ni ikereja suulupale, ni ereeriho, sinoopweteya ni sihikhale.

<sup>113</sup> Mpakha Ekereja eyo ekhale Eyeettiheryo ni Mekaanika; ni Erooho ya Muluku, yaamweettinhe Owo, wira iire itthu Owo siiraly'awe! Vakhala wira Owo ovanre muteko ni isilinturu muloko ni thanu na mosa, siiso-tho Mwaakameliwa onimwiira. Amen! Maana Owo oohimya, mwa Yohani 14:12, "Ole onikaamini Miyo, miteko sinvaraaka nave-tho owo onoovara. Miyo kinoonvaha ikuru sa Eyeettiheryo Aka, Mmekaanikani mwawe, olumwenku ohinrowaaya owerya ovirikanya; ni kinoomuhihimuxa nihiku nookiserya." Owo ti Mutthaka wa Paasikha, Eyeettiheryo ni Mekaanika, vamosa! Mekaanika ehikhalanne Eyeettiheryo, khiveetthu; nnakhala Eyeettiheryo, ehikhalanne Mekaanika.

<sup>114</sup> Munooowerya okhuwela n'unyakula, n'utupha osulu ni vathi, sothene muntthunaanyu, n'ukhootta Masu ala, khenrowa ophwanyiha etthu yooreera. Nyuwo munttikinya paahi i—ipistawu sa . . . Yookhala ephaniphani vale wira epattihe, masi khokhanle kasoliina wira epattihe-no.

<sup>115</sup> Enrowa ovara muteko paahi okathi iyo sinkhalaaya vamosa. Amen! Tivo, mmosa onoochala, nto Mmosa onooowela. Eyo t'itthu emosa paahi ekhanle wa yeeyo. Nnakhala vo, soopiili pooti okhala soolikana, soopiili sinihimya okhala ikereja, soopiili sinihimya okhala Mwaakameliwa. Masi Mmosa

orina Mekaanika *ni* Eyeettiheryo, Ennikhumeleliha, ele Owo ohimaly'awe okhala Ekeekhai.

<sup>116</sup> Khenrowa weetta tu, hata wira Mekaanika ereerale sayi, mpakha Eyeettiheryo orwa. Eyeettiheryo yarwa vale, Mooro owo onookumana ni oktaano ole mukasoliinani. Nto eyo yaphutuwa, enkumiherya epaheyelo, nto opaheya iwo onsukhuma khula mweettelo, khula nivalo, maana Owo mmosaru nsana, olelo, ni mahiku othene. Iwo ohihimuwa. Iwo Owerya w'ekeekhai wa Muluku, Mekaanika ni Eyeettiheryo. Nwehe, "Eyo Erooho envaha ekumi." Ti—ti Ephaniphani empatta. Kahi kasoliina ompatta; ti Ephaniphani enimpattiha kasoliina. Munnona?

<sup>117</sup> "Khiivo enweryaanyu wira muhikhanle mwa Miyo; masi ni Miyo nyuwo munoowerya wira itthu sothene." Siiso Owo sikhanyawe Masu, t'Atithi ankhala. "Atithi aakiruma, Miyo kinimoorumani. Siiso Atithi akipattinhe-aya Miyo ni okisukhumela mwa itthu sothene, kiniira paahi ele emmusivela Muluku. Vano, siiso Awo akiruume-aya, miyo kinimoorumani ni Mekaanika emosaru, ni entthuneya Eyeettiheryo emosaru wira evarihe muteko. Nto ithoonyeryo iya sinimwaatthara ale anihimya okhalana Mekaanika. Eyeettiheryo enookhala voopuroni Vaya."

<sup>118</sup> Paulo ohimnye wira, "Ehapari yooreera enirweenle kahi mwa Masu paahi," ni kasoliina paahi, "masi ni Ephaniphani nave," wira yeettiheke. Eyo vo. Eyo erwiiye wa hiyo enamuna yeeyo.

<sup>119</sup> Eyo Erooho emosaru, yaamuhihimunxe owo, envanhe ekumi mulipa-owamini eekeekhai okela mw'Ekumi Ehinimala. Vano muupuwele, vooweryaneya. . . Vano nwehe, okhala wira okathi ahu onoonimalela. Nwehe, "Erooho emosaru," vano, aRooma 8:1. Vano nrowe nisome-tho yeeyo, mwa aRooma 8:1, nto ninimoona ethu enihimy'aya. Vaareera. Ni kahi aRooma. . . kinihimya, 8:1, kileveleliwe.

<sup>120</sup> Mwa aRooma 8:11, "Masi *vakhala* . . ." Vo ti vari mulattu. Vo ti vari mwaha Awe.

*Nave vakhala wira Erooho awe ole (Muluku, Erooho Yoowaarya) omuhihimunxe Yesu mw'alipa-ookhwa enkhala mwa nyuwo, . . .*

<sup>121</sup> Vano, eyo eri vo, "Erooho ya Mutheli yaakhalaka mwa Mwaakameliwa!"

<sup>122</sup> Okathi Muluku ompanke-awe mutheli Awe oopacerya, Owo aapacenrye ompaka mutheli, ni owo aari soopiili mulopwana ni muthiyana, mwa erooho; aampanke vathayani va elapo ya vathi, wira akhale mwa erutthu. Ni nwehe okathi Owo ompanke-awe Hawa, okhuma mwa Atamu, Owo khaakunxe epantte ekina y'oloko, Owo aakunxe nipattuuxa nimosaru na oloko; Masu mamosaru, maana Atamu aari Nsu noolavuliwa. Munnona? Owo aakunxe mwa yoowo, vano nto khukuxa e . . . Owo aarina

erooho y'olopwana ni y'othiyana. Nto Owo aakuminhe erooho y'othiyana mwa Atamu, khuhela mwa Hawa; tivo eyo nlelo epante ya erooho ya Atamu, eyo erutthu ya Atamu. Vano, yaari erooho ya Atamu, eyeettiheryo, yaavanhe ekumi mekaanika ya erutthu awe.

<sup>123</sup> Tivo Mwaakameliwa ohaana okhala erutthu ya erutthu Awe, ni nikhuva na nikhuva Nawe. Vano erutthu ila enkhwa enrowa okhala sayi erutthu Awe? Ninoophiyerya yeeyo mwa minuutu mmosa, moone. Eniiriwa sayi? Sayi? Exeeni erukunxelo ela yuulupale? Nwehe.

Vano *vakhala wira Erooho awe ole* (Muluku) *omuhihimunxe Yesu mw'alipa-ookhwa enkhala mwa nyuwo, yoowo-tho omuhihimunxe Kristu mw'alipa-ookhwa onoovaha ekumi irutthu sanyu sinkhwa mwaha wa Erooho awe enkhala mwa nyuwo.*

<sup>124</sup> Oh, wulu! Ale ootthommwa, vekeekhai, ntoko Epyo yaaheliwe vattayani, Ole aarina Ekumi mwa yaawo. Sinci-ene saahikhwa; iyo saari epyo yowuntta; maasi ni itthu sikina saahipaha. Masi, moosuwela, yaahikhala Epyo yaaphwanyaneya vale yoolikana wira yaakhele Ekumi. Muluku aahisuwela wira Eyo yaari vaavale.

<sup>125</sup> Vano, Ale ootthommwa t'ampacerya ovahiwa ekumi ni Erooho Yoowaarya, okhala wira Erooho Yoowaarya enrweela okuxa ele Yawaaya. Vano, ela ti yoowiixa vano, ni mukupali wira munoovara saana.

<sup>126</sup> Vano, okathi nsuwa niveleelihiwaaya elapo yothene, kahi wira niruuhele, ekumi myala, seiyo saari ethhaya nave, khinaari wira niruuhele ekumi ethhaya yothene, masi naari wira niruuhele ekumi epante ya ethhaya naavitha ekumi.

<sup>127</sup> Kahi atthu othene anrowa omwaakhela Kristu. Oh, nnari. Masi ale Muluku aathomenle-awe Ekumi, arina empa aya mutthayani mwa elapo, Ala ti Yaawo Owo onrwaawe waavaha ekumi. Ti Yaawo.

<sup>128</sup> Wira, vano, ethhaya eyo enrowa okhala vansuwani vaavale, ni wira, "Oh, nsuwa nla khanireere oviha!" Mwala owo, onimwiira, "Nsuwa nla khanireere oviha!" Masi epyo ele yaamukhaani, yiirale, "Ti yeeyo emphavelaaka," nto khupacerya ophuwa okhalana ekumi. Nlo naahivaha ekumi epante eyo ya ethhaya. Okhala wira, nsuwa naaveleehiwe kahi wira nivahe ekumi nluku, kahi wira nivahe ekumi ethhaya, masi wira nivahe ekumi ekumi ya epyo.

<sup>129</sup> Vano, Erooho Yoowaarya enoorwa vano. Tthiri, khinaaveleelihiwe... Xeeni atthu othene ahinrowaaya waakhela? Khaniveleeliheriwe yaawo.

<sup>130</sup> Mutthu mmosa aahikiirela, "Miyo nkinaamini. Nkincala etthu mwaarowaanyu ohimya. Vakhala wira mwaamuwerya

waahihimuxa alipa-ookhwa, wala etthu p'itthu, ni waavoniha aretta, ni wooniherya Eyo khula enamuna, miyo nlelo nkinaamini Iyo.”

<sup>131</sup> Miyo khwira, “Vekeekhai nnari. Nyuwo mwa mulipa-oohaamini. Khenihimya etthu wa nyuwo. Nnakhala khinveleeliheriwe nyuwo. Aweleeliheriwe ale anrowa waamini.”

<sup>132</sup> Mutthaka ti wa mulipa-oowaamini. W'ale ampweteya, onkhala ololo; masi w'ale ari mwa Kristu, ni akhanle epantte ya Epyo yeeyo, Eyo Ekumii.

<sup>133</sup> Ehantisi aka yaamukhaani enimuhimya mulimi ohelaka nooce, ahiiso nooce na xawawe vathi va mwalyakhu. Munnona? Xawawe ole mwaamukhaani aari, vekeekhai, owo aari mu—owo aari yoopattuxiwa ekhaani, yootikiniha. Okathi mulimi ula vaairale-awe etthu owo aairale-awe, ohela nooce nla na xawawe vathi va mwalyakhu ula. Nto owo khimutohola mwalyakhu ootheiha, ni aari o—aari mwaamukhaani, ootikiniha. Owo khaalikana n'awo. Mapururu awe khayaari ntoko akina aya, ni owo—owo paahi . . . Owo aari mwaamukhaani, ootikiniha saana. Ni alyakhu othene akina yaamusuwela owo okhala ootikiniha. Vano mwalyakhu aaneettasa . . .

<sup>134</sup> Owo hata khaasiveliwa yoolya ole aamulyihaawe. Owo khiyaamusivela tu otholasa mweehilini. Owo, owo khiyaamucala eyo. Vano owo aanixanka mwaha wa xeeni owo aarinaawe okhalaka ootikiniha vale, khula enamuna. Munnona? Ni owo khaalawiha etthu p'itthu ya . . . Owo aalya paahi voophiyerya wira emukhaliheke mukumi, okhala wira owo khiyaamusivela esivelo aya, moone. Okhala wira, owo khaari mwalyakhu, opacerya wene. Munnona?

<sup>135</sup> Ni mwa—mwalyakhu aaniretteha, ni moosuwela, “Mahiku a miiriirya aavira. Khekanle etthu ene eyo. Wiitakaniha ni ekereja.” Eyo khayiiweya saana, ni mwaamukhaani owo. Tivo owo aanimutthara mwalyakhu mpakha nihiku nimosa ame awe . . .

<sup>136</sup> Xawawe muulupale aanisuwela wira aahirela mooce manciene, ni naahikhala nimosa naahaleela. Owo aahisuwela wira xawawe ole aari nipuro nlo, vano owo khupacerya omwaavya. Nto owo aahivava aviraviraka ethoka ya mwaako, ni mukhatoni, ni mapuro othene owo aakhanle-awe okhalaka. Mwa okathi ula, owo, ola okathi wa owo wira oyariwe-ene. Ola okathi wa owo wira othoholiwe-ene. Khwira, “Khino nakhuku oookela khwiya nooce naka; khino marepo. Nkisuwenle. Yookhala etthu ekunxe nooce naka. Masi miyo koosuwela . . . Nooce nlo nri mmuruni mwaka. Kihaana mwaana nipuro nlo. Kihaana omwaavya.”

<sup>137</sup> Ti siiso Muluku. Owo ti Xawawe Muulupale. Mmuupuweloni mw'Awe Owo aahisuwela wira aamurowa okhalana Ekereja. Owo aahisuwela wira aamurowa okhalana athu. Voohicala

exeeni yaawepesa, voohicala vathi va xeeni awo atotholiwaaya, Owo onoowaavya. Owo oniwaavya Awawe.

<sup>138</sup> Nto nihiku nimoso, vootthariha ehantisi, xawawe ola maama aavava vasulu va ehili. Owo aamphavela mapuro othene, vano owo khumphwanya. Oh, ohihimuwa weiwo, wira asuwele wira vekeekhai owo khaari mwalyakhu, mwa sothene. Owo aari xawawe! Ni okathi wothene aaxuttihiwe oweha vathi, omphavela mwaaxikokho wala etthu mw'ehilini. Masi owo khwiiwa okhuwela, wiirale, "Nkawehani *nno!*" Vano owo khuweha osulu, nto yaahikhala yoopattuxiwa emosa jaarina mapupha yaavikana imeeturu xexe, ooweryaxa waavikana alyakhu othene yaari mw'ehilini, ni khuhimya wira owo aari mwan'awe.

Owo khwira, "Maama, koophwanyeni sayi?"

<sup>139</sup> Khwira, "Mutuphe paahi, mpacerye omanamana mapupha anyu, maana nyuwo mwa xawawe."

<sup>140</sup> Moone, owo aahisuwela wira aahikhalana mwaana nipuro nlo. Voohicala wira aaleliwe vayi, owo ookhalana mwaana nipuro nlo.

<sup>141</sup> Ni Muluku onnisuwela! Aleluya! Owo ookhalana Ekereja yoothommwa, yoothokihiwa khalayi-ene! Owo aahisuwela wira ookhalana aana alopwana n'athiyana, ni Mwaakameliwa, onlipelela nipuro nlo; okathi Erooho Yoowaarya empaceryaaya ovava vasulu vaya, eyo Ehupu iyo ehakhinyiwaka. Oh, wulu! Owo mmosaru nsana, olelo, ni mahiku othene. Kahi ehantisi ya ethale, masi ekeekhai!

<sup>142</sup> Voohicala akavi yeererya omuleela, "xawawe," owo khaasuwela etthu yaari xawawe. Nnakhala vo, owo aari xawawe. Owo khaarowa osuwela mpakha woona etthu yaamoonihenrye, owo oonihenryaawe, kiireke.

<sup>143</sup> Nto okathi onoonaahu, kahi muromolelo, kahi Ph.D., nnakhala LL.D., kahi namwaattamanani ooreera murima; masi mwaana a Muluku oowuupiwa voolikana ni Muluku, ni Owerya wa eyeettiheryo wa Muluku wira yaakhule yoovekela ya nihiku nla, wira Owo mmosaru nsana, olelo, ni mahiku othene, khaavo hata mwalyakhu onrowa woovarelani. Owo oniwaavya Ame awe. Owo xawawe, opacerya wene. Owo onnisuwela. Xawawe ola eekeekhai onnisuwela wiithana wa Masu a Muluku. Mwaha wa xeeni? Owo xawawe. Xawawe wa xawawe! Masu ohinatthi mulipiheryo, Masu wa Masu! Masu, ootthommwa, wa Masu oolepeliwa okathi. Nyuwo munnisuwela opuro anyu. Owo onniphavela Eyo.

<sup>144</sup> Ela nto, erutthu ila ya vathi, envahiwa ekumi ni oruuhiwa ni Erooho ya Muluku envaha ekumi wira yiiweleleke Masu a Muluku.

145 Naakuvaka. Okathi owo aatthunaawe osuwela moota aakhanly'awe ophiyaka vale ni yoowo, owo aahiixuttihiwa khaawerya wira yeeyo. "Khamunwerya owela osulu ovikana sinweryaanyu otupha." Owo mwalyakhu. Munnona?

Masi xawawe ola khwira, "Kahiyo siiso."

"Ahe, nkaawehehi alyakhu!"

146 "Hata wira alyakhu ala axeeni, nyuwo mwa xawawe. Mpacerye paahi wookola mapupha awo, ni ovaraha muteko vakhani. Mpacerye owela!"

147 Masu wa Masu! "Miteko Miyo sinvaraaka nave-tho nyuwo munoovara. Ole onikaamini Miyo, miteko sinvaraaka nave-tho owo onoovara." Munnona? "Okhala wira miyo ka mukumi, owo onookhala mukumi nave." "Ni vakhala wira Erooho emuhihimunxe Owo mw'alipa-ookhwa enkhala mwa nyuwo, Eyo enoovaha ekumi erutthu anyu enkhwa." Munnona?

148 Eyo eniira exeenii? Vano nwiriyane, wira musuwele. Nto Paasikha ola, kintthuna wira ohimyaxe etthu wa nyuwo ovikana khula Paasikha otonko awe wira. Munnona? Kintthuna wira moone. Hiyo noosuwela etthu aamwiirihalyawe Owo; masi kintthuna wira moone, kahi onrowa wira, Oowiirelani yeeyo nyuwo. Munnona? Eyo eniira exeenii? Eyo envaha ekumi erutthu enkhwa. Erutthu ila enookhwa hiyo onkhalaahu-mo, Owo onvaha ekumi yeeyo, mwa moolumo makina, enruuha mw'Ekumini.

149 Vano, nyuwo mwaatonko weetta ni soona muulupale mwaano mwanyu, n'itthu sothene, wala nikuttha na asikaro; ni nyuwo athiyana mutonko okhalana maihi ookhuveya, oowiipintari, ni mwiiraka siiso, ni mwaawaraka akaputtula, n'itthu siiso; naanaanoru, Etthu khukhuwela, vano nyuwo khuweha vathi wa nto yaari Masu. Moone, Awo aavaha ekumi yawinyu...Nyuwu khwira, "Nkinaatthuna-tho akaputtula, nkimmuthuna-tho aalikoro, khiwaavo-tho wootha, khiwaavo-tho wiiya, khiyaavo-tho *ela, ele*." Munnona? Erooho emuhihimunxe Owo mw'alipa-ookhwa, ekhalaka mwa nyuwo, enooruaha-tho irutthu sanyu sinkhwa, etthaya ya vathi, wiiwelela. Munnona? Exeeni iyo? Wiiwelela exeenii? Kristu. Kristu taani? Masu. Kahi teyoloxiia, masi Masu!

150 Vano nyuwo muniira, wira, "Itthu iya, oh, kinoona wira ti yoolikana athiyana owara ikalsa."

151 Nave, Masu yiirale, "Nnari." Moone, Eyo enoovaheryani ekumi Yaawo. Munnona? Nyuwo moovariwa murima ni Yeeyo. Moone, ti nyuwo, nto. Eyo enikhala...Nyuwu munikhala epante ya Masu. Eyo yooruaha erutthu anyu, kahi. . .

152 Ahe, nyuwo muniira, "Ahe, vano, mukihye kooleleni etthu. Pastore aka. . ." Khenikicala etthu pastore anyu ohimmyawe; tile Masu anihimyaaya! Mwaatthunaka okhala mwalyakhu,

mukeleleke ohoolo ni yoowo. Masi pastore alavula voovirikana ni Masu ala, vano owo kahiyo mulipa-oowaalyiha axawawe; uh-huh, owo namaalyiha alyakhu, moone, kahi a axawawe. Munnona? Xawawe onlya Yoolya ya xawawe. Munnona? Eyo ennivaha ekumi!

<sup>153</sup> Bibilia ohimnye wira ti yoonanara wira yeeyo, ni mulopwan'owo ni sikina sothene siniiraanyu, ti yoovonyeya. Mwiire, "Mahiku a miiriira aavira." Bibilia ola ohimnye wira Owo mmosaru nsana, olelo, ni mahiku othene. Awo yaahimyaka wira, "Eyo osoma miyuupuwelo. Ni muthinto mmosa w'osoma muupuwelo, olamula nno sa mmurimani. Ni sowoona iya sothene ni itthu, wira ethiruu," moone, awo alyakhu. Awo khansuwela ele ekhanle Yoolya xa xawawe.

<sup>154</sup> Masi, munna, mwaiwa okhewela iwo, yookhala Etthu mwa nyuwo! Nyuwo mwa xawawe, opacerya wene. Mwaha wa xeeni? Nyuwo mwa Epyo, mwemmo ohihimuwa wa M-w-a-a-n-a wiireiye-aya, ni ehahikhinyeriwaaya Ehupu elapo ya vathi, wira oosuweliheni wira nyuwo mwa xawawe ni kahi mwalyakhu a muromolelo. Munnoona yeeyo? Hah!

<sup>155</sup> "Vakhala wira Erooho emuhihimunxe Owo mw'alipa-ookhwa," Masu, Eyeettiheryo ya Masu, "enkhala mwa nyuwo, Eyo enoovaha nave-tho ekumi erutthu anyu enkhwa." Vano hiyo ninkhala sayi erutthu ya erutthu Awe ni nikhuva na nikhuva Nawe? Okhala wira, naakuvaka, nlelo hiyo ninaamwi naari anatampi ankhwa, ookhwa, oolikana wira nikhwe, irutthu iya, Eyo envaha ekumi erutthu iyo. Exeeni *ovaha ekumi*? "Oruaha mw'Ekumini." Erooho yaasiveliwa owurya, weettasa pure, oraruwa, ni sothene iya, yoovahiwa ekumi; vano, etthu ene ehookhwa, ni moohihimuxiwa. Eyo envaha ekumi erutthu anyu enkhwa.

<sup>156</sup> Tivo, irutthu sanyu empa ya Eyeettiheryo, okhala wira (mwaha wa xeeni?) okhuma wopaceryani nyuwo mwa epantte ya Mekaanika. Oh! Vo ti vari ohihimuwa wanyu. Vo ti vari Ekereja moohihimuwani, ni Yoowo. Irutthu iya naanaano va ti soovahiwa ekumi. Moone, nyuwo muhiiwa; munnaamini. Eyo ehoorukunxani okhuma muromolelo okela Mmasuni. Munnona?

<sup>157</sup> Eyeettiheryo, yarwa vamaasini, enoopuphuruwa paahi, "Mahiku a miiriira aavira." Pomp-pomp-pomp, "Oh, kinnimwaamini Bibilia," pomp-pomp-pomp, "masi khekha-khekanle no. . ." Pomp-pomp-pomp! Munnona?

<sup>158</sup> Masi Owo vamphwanyaawe oktaano ekonto emosa, "Burrrrrr," enkhuma etthimakaka, moone. Moota, wulu, Eyeettiheryo emphiyeryeeya Yeeyo! Masi Eyo yamphiyerya Mwalyakhu, khenvara etthu. Masi okathi Eyo enimphiyeryaaya xawawe, owo onookhuma avavaka. Amen! Eyeettiheryo ni Mekaanika! Munnoona enihimy'aka? Eyo ti wii, owo akhala-ru xawawe eekeekhai vano, owo "onimwiiwa saana."



159 Mukihiye koolakiheryeni Yoolempwa yaamukhaani va. Kinoona wira aattipihiwa atelefooni, masi nlelo niri vaava. Yohani Oowaarya 5:24, Yesu ohimnye wira, “Ole oniwa Masu Aka, ni onimwaamini Ole okirumme, ookhalana Ekumi ehinimala.” Vano nwehe, miyo kinrowa keettaka mphironi ni okuxa eyo vekeekhai, ele ehimnye aya, kihirina maiwelo a muroohononi. . . Kihiihaka Eyo ohimya etthu ekina, masi ohimya paahi ele Eyo enihimya’aya, moone, nuulumo noolikana vo, mw’Ekereku, mwa yoopacerya, nnihimya wira, “Ole oniiwa saana Masu Aka.”

160 Vano, wira kooniherye wira eyo ekeekhai. Miyo kinoorowa nno, nto va onrwa namuhapaliwa eettaka mphironi, ni mwaara a mulopwana mukina mmoononi mw’awe, ni aruwanaka, ni oromola Nsina na Muluku veethiru, n’itthu sothene sikina siiso. “Eyi, muhiwa etthu mulaleyi ohimya’awe? Muhiiwa?” “Ayo, kihiiwa Eyo!” Eyo khenihimya wira ookhalana Ekumi Ehinimala. Munnona? Munnona?

“Ole oniiwa Masu Aka,” ole okhanle xawawe!

161 “Vano, Munna Branham, kintthuna-tho Yoolempwa ohiya yeeyo.”

162 Vaareera, “Ipwittipwitthi Saka sinniiwa Nsu Naka. Oohimusuwela iyo khasimmutthara.”

163 Ntoko mwaha wa *Othelana Ni Omwalana*, nihiku nlo. Okathi Erooho Yoowaarya ekihimenryaaya yeeyo, miyo kaahirwa khuhimya siiso ntoko Eyo yaakihimenrye-aya.

164 Muhano mmosa mulaleyi khukipwapwela saana, akhuwelaka vakhani. Owo khwira, “Kinoona wira munkuxa opuro wa Muluku?”

Miyo khwira, “Nnari, muthiyana.”

165 Khwira, “Ahe, nyuwo mwaaleenle wira itampi saya sooleveleliwa.” Khwira, “Vayi?” Khwira, “Muluku paahi t’orina owerya.” Moone, mFarisi mukina. Munnona? . . . ? . . .

166 Miyo khwira, “Moone, wira musuwele, wira, Yesu aahimuhimeerya Petru n’arummwa, vaamanly’awe okhalana muupululo wa Ole Owo aary’awe.”

Owo aamuhimenrye wira, “Nyuwo mwa Kristu, Mwaana a Muluku.”

167 Owo khwira, “Ooreeriwa ti nyuwo,” moone, “mwaana a Yona; erutthu n’iphome khewuupululenleni Ila, masi Atithi Aka ari Wirimu t’awuupululenleni. Vamwala va Miyo kinootekavo Ekereja Aka; mikhora sa mookhwaani khasinwerya oxintta Yeeyo. Vano miyo kinoovahani ihulelo; sothene sinrowaanyu otthuka vathi va, Miyo kinootthuka Wirimu; enrowaanyu otaphula vathi va. . . .”

168 Owo muupululo yoowo w'eMuluku wa Masu oowiipaka erutthu. Vakhala wira Eyo yaari erutthu nihiku nle ni Mwaana, Mutheli, Eyo erutthu olelo ni Mwaakameliwa. Munnona? "Ale onrowanyu waalevelela itampi, awo anooleveleliwa; ale ohinrowaanyu waalavelela itampi, awo khanleveleliwa."

169 Vano, ekereja Katolika enookuxa eyo khwaannya anamukuttho aya, masi eyo ti y'erutthu.

170 Nwehe, yaari Masu oowuupululiwa, mwa erooho yiirale eyo!

171 Mwaha wa yeeyo Owo aahimeenry'awe wira erowe yapatise mwa "Nsina" n'Atithi, Mwaana, Erooho Yoowaarya. Owo aahisuwela wira awo yaanimusuwela Owo aari Pani.

172 Kilavulaka ni mulaleyi mmosa mwaamukhaani nihiku nlo, owo aahikiirela, owo khwira, "Vano, Munna Branham, miyo kookhuma khwiitakaniha, khurowa ekereja *khata-khata*, ekereja ya Pentekosite."

173 Mwemmo, aPentekosite vano aapacerya omulya oxitiya oovilikeya, moosuwela. Nyuwo muhiwa eyo, woona waka; koxeri, muluku a mweeri, moosuwela. Ni othene aya aakupali ni annimulya. Mulopwan'ola khwira . . . Mu—muthukumano awe waaroomuwela; owo khwira, "Ele miyo enreerihaaka ti yooreerhiwa." Vano, kahi ele namukuttho enihim'yawe, owo "ohaana owerya wo orukunxa khukhala erutthu ya Kristu"? Moone, thanu na mosa sa emosa ni etuusiya nuusu ya ekina, ekhalaka emosaru.

174 Nto owo khwira, "Kintthuna kookoheni etthu." Owo aaphavela otthyawa mwaha owo wa opatiiso mwa Nsina na Yesu, okhala wira ola aari mulopwan'ole iirale aari—aari nwanani a Kristu wira siiso. Owo khwira, "Munuupuwela wira ti yoothuneyaxa wira mutthu apatisiwe mwa Nsina na Yesu Kristu?"

Miyo khwira, "Ayo, mulopwana."

175 Owo khwira, "Vamanly'awe opatisiwa ni nsina na 'Atithi, Mwaana, ni Erooho Yoowaarya?"

176 Miyo khwira, "Ayo, mulopwana. Owo khopatisiwe, nnakhala. Munnona? Owo khopatisiwe, nnakhala; hata Nsina. Eyo etiitulu." Miyo khwira, "Khenkupaliwa." Miyo khwira, "Mwaha wa xeeni—mwaha wa xeeni Petru . . ."

177 Owo khwira, "Ahe, vano, mukihiye kooleeleni etthu." Owo khwira, "Vano, mwa Miteko 10:49, owo ohimnye wira, 'Petru nlelo alavulaka moolumo ala, Erooho Yoowaarya yaahaakhuruwela.'"

178 "Masi," miyo khwira, "owo khurukunuwa khwira, 'Ookhala oniwerya okhottiherya maasi wira atthu ala ahipatisiwe?'"

179 Owo khwira, "Ahe, nyuwo mwaalavula vale, okathi vakhani ovinre, mwaha wa Miteko 19, vaavo Paulo aavinre-awe

mmittettheni sa wEfeso, khwaaphwanya awiixutti ale.” Nto khwira, “Vano,” khwira, “awo khiyaapatisiwe mwa nsina n’Atithi, Mwaana, ni Erooho Yoowaarya.”

<sup>180</sup> Miyo khwira, “Nnari, awo yaapatiseriwe ‘orukunuxa murima,’ kahi oleveleliwa wa itampi. ‘Orukunxa murima,’ okhala wira yiira ehinatthi osuwelihiwa Yesu nlelo. Mukuttho wiira ohinatthi ovahiwa.”

Owo khwira, “Ahe, xeeni vaatthuneiyeye-aya awo opatisiwa?”

<sup>181</sup> Miyo khwira, “Mulopwana aarina ihulelo, ohimmye ela, ‘Okhala wira musuweleke wira khanivo Nsina nikina vathi v’Erimu nivaheriwe eriyari y’atthu, mukhanlyanyu woopoliwaka ni nenlo.”

<sup>182</sup> Woopowa onkhala paahi mwa Nsina na Yesu Kristu. “Sothene siniiraanyu ni moolumo hata ni miteko, mwiireke sothene mwa Nsina na Yesu Kristu.” Khanikhanle nsina nikina, hata ekereja, hata ethokiheryo y’oruma, nnakhala ititulu, wala etthu ekina! Nakhala vo, Owo ti Ethutu ya Saroni, Ekhekowa ya Mukhatoni, Etheneeri y’Oxaka, Alfa, Omeka, Ephattu ni Emalelo, Yehova-yire, -rafa, manase, sothene iya. Owo itthu iya sothene, masi nnakhala vo Owo... Khiwaavo woopowa mwa hata emosa wa ititulu iyo; *Yehova*, hata woopowa; *Ethutu ya Saroni*, hata Owo okhalaka, khokhanle woopowa; *Tithi, Mwaana*, wala *Erooho Yoowaarya*, khuwaavo woopowa. Nsina paahi na “Yesu Kristu!” Vano nto Bibilia ohimmye, wira, “Orukunxa murima n’uleveleliwa wa etampi ohaana wiixuttihiwa mwa Nsina Nawe, opacerya oYerusalemu, ni mpakha omalenle elapo.”

Owo khwira, “Munuupuwela wira ennivirikana?”

<sup>183</sup> Miyo khwira, “Mwenye, kintthuna kookoheni etthu emosa.” Owo ni miyo, ni amwaar’aka, naakilaanthe vameesa. Owo aammalaru ovira. Okoona, khurowa... Miyo khwira, “Oowaili ahu n’anammuttettheni a wArizona; hiyo ninkhala wenna. Nto miyo, ni hiyo ninnisuwela ekonselyo ahu, ni namathoonyerya ahu, ni sothene, ni mukhulupale ahu a mpooma, kuvernatooro, itthu sothene.”

Owo khwira, “Ayo.”

<sup>184</sup> Miyo khwira, “Vano, vaakhanle wira kaamooleelani, munna, wira, ‘Murowe nno mwailepihe mwaha wa yoolya ahu y’ohiyu, mwa nsina na Kuvernatooro a Elapo ya wArizona,’ nyuwo mwaamurowa olepa siiso? Munuupuwela wira yaamwaakheliwa eyo vameesa?”

<sup>185</sup> “Vano,” owo khwira, “Kinoona wira nnari.” Owo khwira, “Xeeni Yesu akelaka ohimya siiso?”

<sup>186</sup> Miyo khwira, “Ti yeeyo, moone. Mwaha wa xeeni? Kooleleni wira ‘murowe mwalepe mwaha wa yoolya ela y’ohiyu, mwa nsina na Kuvernatooro a Elapo ya wArizona,’ ni

hiyo niryeene anammuttettheni a wArizona, ni nimusuwelaka ole okhanle Kuvernatooro, vano, mwaamusuwela wira mwaahaana olepa mwa nsina na 'Sam Goddard,' moone." Miyo khwira, "Okhala wira, owo ti Kuvernatooro a elapo. Miyo nkirina yo wookohakani. Nyuwo moosuwela t'ani okhanle Kuvernatooro. Nto, okathi Owo iiraly'awe, 'Tithi, Mwaana, ni Erooho Yoowaarya,' Owo aanisuwela moota yaarowasaaya opatisa. Awo yaanisuwela wira Owo aari Pani. 'Ipwittipwitthi Saka sinniwa Nsu Naka.' Munnona? Munnona?"

Owo khwira, "Oh, kinnoona."

<sup>187</sup> Masi vano, etthu enttharelana, munimwaamini? Munnona? "Ole oniiwa Masu Aka, ni onimwaamini Ole okirumme, ookhalana Ekumi ehinimala." Nto Ekumi ila esya Ehinimala yaakhalaka mwa nyuwo, ti oweryaneya.

<sup>188</sup> Okathi munaakhelaanyu Erooho Yoowaarya ela vano, awo yaakhelanse-aya oPentekositeni; awo yaari mekaanika, vano Eyeettiheryo yaahaana orwa. Awo yaahaamini. Moosuwela, apatthani ahu ooreera murima aPatista annihimeerya wira, "Okathi hiyo onaamini ahu, nookhalana." Masi, awo khayaarina, anaamwi yaaminni.

<sup>189</sup> Miteko 19, awo yaahaamini, masi khayaarina. "Muhaakhela Erooho Yoowaarya okhuma okathi mwaaminni anyu?" Munnona? Awo yaarina Mekaanika, vaareera, okhala wira arummwa yaari. . . Wala, kinihimya wira, Apolo aamwaaxuttiha ni wooniherya ni Bibilia, Mekaanika, wira Yesu aari Kristu, masi awo khayaarina Eyeettiheryo nlelo. Munnona? Ti yeeyo. Vaareera.

<sup>190</sup> [Nipuro vahiitthu mufiitani—Mol.] . . -kaanika, nyuwo vooweryaneya mookhalana neemexeryo, owehererya.

<sup>191</sup> Vano, vanaakhelaanyu Eyeettiheryo, moovahiwa ekumi okhuma mwa okhwa khukela mwa ohikhwa. Enniiriha erutthu yothene wiiwelela Masu. Eyo ennoopakihani voovirikana, oweha woovirikana, okhala voovirikana. Eyo enimookhalihani oovirikana.

<sup>192</sup> Vano nkawehani. . . [Nipuro vahiitthu mufiitani—Mol.] . . . ovahiwa ekumi. "Nyuwo mwaahikhwa mutampini ni soottheka, ni mweepiphini, Owo ohoovahani ekumi." Mwaha wa xeeni? "Erooho Awe emuhihimunxe Yesu," voosiisu wa Paasikha, "mw'alipa-ookhwa. Nto Eyo yaakhalaka mw'erutthuni mwanu enkhwa," vano nwehe, "Eyo ennivaha ekumi nave-tho, enniruuha mw'Ekumini, enimookhalihani oowiiwelela Masu."

<sup>193</sup> Vano, muniwerya sayi ohimya wira mookhalana Erooho yeeyo, nave munaihuluxa Masu? Nyuwo munvahiwa ekumi ni etthu ekina. Maana, Eyo enoovaha ekumi irutthu sanyu sinkhwa wa Masu. Vekeekhai, enimwiira.

194 Khimukhanle okelelaka ohoolo muhirina Eyo. Munrowa opuphuruwaka, mwaahimini-ru yothene Eyo. Mwakhalana-ru epantte emosa kasoliina nto epantte ekina maasi, khamunrowa hata nipuro. Munnona? Muhaana omukuxa ipursento emiya, kasoliina. Mwaahiire, enoophutuwa ekhumelaka ottuli, nto khamunrowa okhalana owerya. Munnona? “Masi miyo—miyo kinaamini *ela*, masi nkinaamini *Ele*,” pomp-pomp-pomp-pomp. Khimunrowa hata nipuro.

195 Masi, oh, mwakuxaru omalela! Epatte ni yeeyo, Masu othene Ekeekhai!

196 Vano nwehe vano, nimalihaka, nwehe ela. Nwehe, vekeekhai eri ntoko ekhaani—epyo yaamukhaani emphwanyaneya mutthayani.

197 Vano, vooweryaneya, nyuwo moohihimuwa. Nyuwo moohihimuwa okathi munaakhelaanyu Erooho Yoowaarya mwa nyuwo. Nyuwo moohihimuwa okathi ene yoowo. Erutthu anyu vooweryaneya yoohihimuwa.

198 Nkawehani epyo yaamukhaani. Mwaale mutthayani. Ehaana owurya v'ephattuweloni Vawe, maasi aniyeehereya vathi. Nto yaawuryaka, enimunnuwa mpakha wa Yoowo, ephieryaka olikanaxa ni epyo yaakenle mutthayani. Munnona?

199 Ekereja erwiiye siiso, mwa okhalihwa naxariya, oreerihiwa, opatiiso wa Erooho Yoowaarya, vano enoophuwa. Munnona? Erooho ya Muluku evinre mwa yothene eyo.

200 Nto erooho ya molumwenkuni erwiiye eviraka mwa nwanani a Kristu, enamuna emosaru, nto vano enoophuwa mwa wiiraana wuulupale wa ikereja, moone, etthu yothene.

201 Ni mutthu onrwa siiso. Itthu sothene sinvara muteko mwa enamuna emosaru, mwa eyeettelo emosaru ya Muluku, okhala wira Owo mmosaru nsana, olelo, ni mahiku othene. Nwehe, mphironi mwanu, munnuwaka mpakha omalela wa ohihimuwa, mweettihiwaka ni Erooho!

202 Ntoko nsuwa, n-s-u-w-a, ninruuha mwiri ule mukhaani onwurya vephattuweloni va Muluku, onthikela paahi... Moone, owo onwerya owurya mw'etthu emosa paahi. Muyeeherye makhura epyo eyo yaamukhaani emaara emosa; mwaamwiiva. Ti yeeyo. Muyeeherye maasi oottakatta, maasi ahikhanle ooreera, oonanara, anookhoottiherya wunnuwa. Khonrowa wiima muhokorokho. Eyo ekeekhai? Masi muyeeherye maasi ooreera a epula, amen, ahirina ikiimiku soopakiwa ni mutthu, yaale paahi anrwa okhuma wirimu osulu, nto nwehe mwiri mwaamukhaani owo. Khaavo maasi anrowa wunnuwiha owo ntoko maasi a epula. Muhele kolooru ni itthu, ntoko mumphavelaanyu oniiriha hiyo, ni, naanaanoru, onimwiiva mwiri.

203 Ti yeeyo eniireya olelo. Awo aneererya waavaha maasi ankhuma veephattuveloni ya muromolelo, nto anookhoottiherya wunnuwa. Munnona? Masi mmutthuniherye aphwanye:

Murwe vaavo mattoitto a ikharari anaary'aya;  
Anaarya mwa miyo othana ni ohiyu,  
Yesu, Waarya wa mulaponi.

Nto moosuwela saana, nto.

Ninrowa weetta moWaaryani, Waarya iwe wooreera,  
Onrwa vaavo mattottoi a okame wa ikharari anaary'aya;  
Anaarya mwa miyo!

204 Mukumihe iphattuwelo iya soopakiwa ni mutthu mwa miyo! "Khekhanle hata ephattuvelo ekina miyo ensuwelaaka, hat'etthu woohikhala Ephome ya Yesu!" Eyo ti Ephattuvelo yothene miyo entthunaaka osuwela. Mutthuniherye Masu ekhale mwa miyo, Pwiya; mukhuwari Yaawo ni Erooho Anyu.

205 Nwehe, vano, vakhala wira Erooho ele emuhihimunxe Yesu mmahiye, enkhala mwa nyuwo, vooweryaneya mookhalana Ekumi; ooweetthiwa ni Erooho, wira evahe ekumi Masu, wira mwaamini Yaawo. Etthu ile yaamukhaani enoottthikela esukhumelaka ota okathi eninnuwaaya.

206 Nwehe, oPentekositeni, irutthu saya saahivahiwa ekumi wa Ekumi esya. Nkawehani nikhuru nle na anawoove.

207 Kinimoopisihani vanci-ene? [Muthukumano oniira, "Nnari."—Mol.] Nkawehani, kinimwiivihaha paahi, ti yeeyo, wouna oreera. Oh, wulu!

208 Nwehe, awo yaari anawoove. Nwehe. Masi, awo yaahikhalanasa Mekaanika. Munnona? Masi othene aya yaakilaanthanse vale, yiiraka, "Oh, kinniwoova. Oh, kinnoova okhuma ni ohimya, okhala wira, oh, mapixipu ale othene aalupale ni itthu ota iwe. Oh, kinnoova. Anamukuttho ale ni itthu, kinnoova ohimya yeeyo, kinoova ohimya wira koomwaamini Yoowo. Oh, nkinwerya wira eyo, moone."

209 Masi, naanaanoru, Eyeettiheryo yaahirwa. Ayo. Nto Eyo yiirale exeenii? Eyo khiyaasarihale erooho aya paahi, muhina, masi Eyo yaahivaha ekumi mekaanika aya. Irutthu saya saahivahiwa ekumi. Awo khayaari-tho anawoove. Awo yaahikumelasa ota ohoolo w'atthu. Ayo, mulopwana. "Nyuwo atthu a oYuteya, ni nyuwo munkhala oYerusalemu!" Weiwo, Eyeettiheryo ehinatthi orwa, awo yaaryaya mekaanika paahi. Munnona? "Nyuwo atthu munkhala oYerusalemu, musuweleke ela, ni mwiiwe masu aka! Ala khahapalasiwe, ntoko sinuupuwelaanyu."

210 Miyo ka mmosa a yaawo. *Ela* ti Yeele! Kinoooonihani exeeni iyo. Eyo ti Yooolempwa. *Ela t'ile!* Ni miyo kweekwe kinnihimyaka, “*Ela* yaahikhale Yeeyo, mukihye kisuke *yeela* mpakha Ele orwa.”

211 “Nnari, ela ti Yeele yaahimmwe ni profeta Yoweli, ‘nto enimwiiraneya mahiku ookiserya, onihimya Muluku, Miyo kinimwaamwaraxela Erooho Aka atthu othene.” Moone, Eyeettiheryo yaahirwa mmekaanika. Awo khayoovasa-tho.

212 Akina wa nyuwo atthu munoova wira muthiyana onimootheyani mwaha wo okhalana maihi oorakama, wala ohiya wiisoottiha itthu; akina a nyuwo alopwana munoova mutthenkeso anyu owoomolani mwaapatisaka muthukumano anyu ni opatiiso wa Yooolempwa; munnithuneya wiiwalela empa y’osulu mpakha Eyeettiheryo orwa. Ti yeeyo.

213 Eyo yaahaarukunxa. Eyo yaahaavaha ekumi. Eyo yaahaakhalaha oovirikana. Awo yaari atthu oorukunxiwa, okhuma vaavo mpakha ohoolo. Eyo yaahaavaha ekumi, mwa makhalelo a khalayi ookhala anawoove, mpakha okhala ntoko Kharamu a nihimo na Yuta. Awo vekeekhai yaahoonana ni okhwela waamini, yaahikhomeliwa mmiikimanyoni, okhomeliwa vamwiikimanyo erukunxeliwe vathi, opahiwa, yaahiriheliwa mulittini mwa amwatto. Khiwaakhanle-tho woova, wa yaawo. Okhwa khuwaarina oxintta wa awo, nnakhala. Eyeettiheryo yaari mmekaanikani. Ayo, mulopwana. Eyo yaahivaha ekumi erutthu aya enkhwa.

214 Vano nwiriyane. Va yookhala etthu ekina, ntoko mooniheryo. Eyo yaahaavahaxa ekumi mwa enamuna emosa mpakha (Nyuwo moosuwela?) awo yaahivenxeriwa mapuro a Wirimu, ni irutthu saya sinkhwa saahivahiwxaxa ekumi mpakha elavulelo aya orukunuwa. Eyo paahi. . . Eyo yaahivaha ekumi elavulelo aya. Ti yeeyo Bibilia ohimmyaawe. Ni, irutthu saya sinkhwa sivahiwaka ekumi, elavulelo aya yaahivahiwa ekumi. Miyuupuwelo saya saahivahiwa ekumi. Irooho saya saahivahiwa ekumi. Makhalelo aya yaahivahiwa ekumi. Awo yaahivahiwa ekumi, voomalela! Awo yanitthuna olavula, nave khiyaawerya olavula mattaava makina a atthu. Awo yaahivahiwxaxa ekumi Ohoolo wa Muluku mpakha yaalavulaaya ilavulelo isya, nttaava na Wirimu. Whish! Owerya xeeni woovaha ekumi!

215 “Vakhala wira Erooho emuhihimunxe Yesu mw’alipa-ookhwa enkhala mwa nyuwo,” oh, aleluya, “Enoovaha ekumi erutthu anyu enkhwa.” Enimoopakihani itthu mwahirakaanyu khalayi. Awo yaahisareya Owerya woovaha ekumi nto. Munnona?

216 Erutthu anyu kheniwelela-tho etampi; nyuwo, sootthuna sanyu.

Owo onimwiira, “Mukhumele ota nno!”

Nyuwo muniira, “Mutthuke eyano anyu.”

“Oh, hiyo nrina muulupalexa . . .”

“Mutthuke eyano anyu.” Wulu, nyuwo mwa xawawe!

<sup>217</sup> Mootoko woona moota xawawe oneettaawe vootaphuwa? Owo khontupha-tupha ntoko marepo, moone, wa khula etthu yookhwa, ni enama yoowuntta yothene emphwanyaneya vathi. Nnari, mulopwana. Owo oneetta owiisoona.

“Mutthuke eyano anyu.”

“Oh, va yookhala yolya y’ohiyu yooreera *va*.”

<sup>218</sup> “Kahi wa miyo. Moone, soothuna saka soorukunxiwa. Ikhwilyu saka ti soovirikana. ‘Okhala wira mutthu khonkhala mukumi paahi ni enama yoowuntta ya molumwenkuni, masi ni Masu othene ankhuma mwaano mwa Muluku.’” Xawawe eekeekhai oovahiwa ekumi onkhala ni Yeeyo. Amen!

<sup>219</sup> Oh, ni Owo oomuhihimuxa Kristu mmahiye, akhalaka mwa nyuwo, oovaha ekumi erutthu anyu enkhwa Ohoolo Wawe. Nyuwo moosuwela Eyo. Nyuwo khamuhiyo-tho namathola. Nyuwo mwa xawawe. Khamunthuna itthu sa molumwenkuni. Nyuwo mwa mwaana mulopwana ni muthiyana a Muluku. Nyuwo mumpaka niira v’Ephattuweloni olumwenku ohinsuwelaaya hat’etthu ya yeeyo. Nyuwo munwurya Vaavo. Mutthu onnisuwela . . . Olumwenku khonsuwela hat’etthu ya yeeyo. Nyuwo munlya Emana yiipitihawe olumwenku hata ohinasuweleke-aya etthu ya Yeeyo, okhala wira nyuwo mwa xawawe. Nyuwo moovahiwa ekumi mpakha osulu munweryaanyu ophwanya Yeeyo. Khimunwerya ophwanya Eyo vathi *va*, muhaana owela osulu *nno*. Muhaana ovahiwa ekumi, oovenxiwa osulu iwe, wira Eyo yoovaheni ekumi.

<sup>220</sup> Awo yiirale exeenii? Awo yaalavunle nntaava nikina. Bibilia ohimye wira awo yaahilavula. “Awo yaahilavulasa mwa khula mattaava othene vathi v’Erimu.”

<sup>221</sup> Mwaamuwerya otthokelela yeeyo, irutthu iye sinkhwa saari vale, saakhanle wiiraka, “Ahe, nkisuwenle, vano, sinto kinoowerya waamini yeela wala nnari?”

<sup>222</sup> Naanaanoru, awo yaahivahiwa ekumi mpakha owali wa Kharamu a nihimo na Yuta omorela mwa yaawo, mwa Ehupu iyo yaahakhinyiwa. Oh, Xawawe ole aahirwa owiitthana Awawe! “Ni khiyaaphentale ikumi saya mpakha okhwa.” Amen.

Ni anooroowa okhala akina-tho anrowa ovaha  
ephome y’ekumi aya

Maana Ehapari yooreera ela ya Erooho  
Yoowaarya ni okhwalala waya wooxeerya.

<sup>223</sup> Nto Mwaana ohaana okhala—wiisooniherya-tho, mwa Mwaakameliwa mahiku ookiserya; Owerya woovaha ekumi ohaana orwa, waavahaka ekumi okhuma miromolelo iya sookhwa ni iyaaminelo, mpakha Masu makumi a Muluku mukumi. Oh!



224 Nnari, Eyo yaahaavaha ekumi okela mw'Ekumini esya. Eyo enniirela etthu emosaru hiyo vano. Nwehe, nto, awo yaahivahiwaxa ekumi mwa Owerya iwe woovaha ekumi! Vano miyo...

Nwiriyane oratteene vano. Kimphavela owoonihani.

225 Owerya woovaha ekumi khuwaari paahi mmunepani mwaya, masi waari mwa yaawo othene. Eyo... Kahi Eyeettiheryo paahi yaakenle, wira evahe ekumi, masi Eyo yaahivaha ekumi mekaanika. Munniiwa enihimy'aka? Awo yaahivahiwaxa ekumi mpakha malumi aya opacerya olavula mattaava makina. Awo yaahivahiwaxa ekumi ni Owerya wa ohihimuwa wa Kristu, mpakha yaawiixaatherya'aya matata aya... Awo yaahivahiwaxa ekumi ni Owerya woovaha ekumi, mpakha, okathi yaawiixaatheryaaya matata aya aretta, awo yaanivona. "Eyo yaahivaha ekumi erutthu aya enkhwa." Awo yaahivonihwa, mwaha wo wiixaatheriwa matata.

226 Nto Erooho yaahivaha ekumi opatthana waya vamosa ni Muluku, mpakha yaakhalanse-aya nave oovahiwa ekumi Mmukhaleloni mwa Muluku mpakha, mutthu akhwa vale nto munepa aya khurowa, Eyo yaanimwiitthana okhala-tho mukumi. Amen! Ovuwa! Vano kinnoona okhala natiini.

227 Eyo ekeekhaii, oovahiwa ekumi! Ohihimuwa Wawe khiwaari wa Yoowo paahi, masi wa ole ontthuna, wa Epyo ela yoothommwa emphwanyaneya vale. Envaha ekumi, ennivaha ekumi erutthu enkhwa!

228 Awo yaaniwiixaatherya matata aretta; awo yaanivona. Awo yaahivekela; mwa Erooho yaanoona soowoona, owiitthana ookhwa otthikela ekumi. Ti yeeyo. "Yaahivaha ekumi erutthu aya enkhwa."

229 Eyo yakela mwa nyuwo; vakhala siiso... Vano, nyuwo munoowerya ohimya wira ti siiso; masi vakhala siiso, ithoonyeryo iya sintthara yeeyo, moone. "Eyo envaha ekumi erutthu anyu enkhwa." Eyo enimoovahani ekumi.

230 Vano, nwehe, ovahiwa ekumi Ohoolo wa Muluku. Mwaha wa xeeni? Yaari Erooho ya Muluku emuhihimunxe Yesu mmahiye. Nto, Erooho ya Muluku, "Miyo kinaavaha Ekumi Ehinimala," enrwa mwa nuulumo n'Ekereku, mwaphavela vale, Zoe, yeeyo eneettiha ela ovira mwa nyuwo vano nto ovaha ekumi (sawaya) hata muupuwelo aya.

231 Vano nkawehani. Munwerya sayi ohimya wira Erooho eyo enkhala mwa nyuwo? Munaamwi mwiirale sothene muupuwelaanyu wira saari soolikana, va eri eyooniheryo anyu vakhala wira mookhalana Yeeyo wala nnari. Vakhala wira Erooho yaari mwa Kristu eri mwa nyuwo, Eyo nave-tho enimoovahani ekumi mpakha Mmasuni, okhala wira Owo ti Masu. Nto yakhala, yoovirikana, ni woovahani ekumi yoohuluxakani Masu, weeso kehiyo Erooho ya Kristu! ...

voohicala exeeni mwiiraly'anyu, Eyo yaahookelihekeni Mmasuni. "Ipwittipwitthi Saka sinniwa Nsu Naka, ni iyo sinookhala ni Masu othene," Masu othene! Miyo kaalavula yeeyo nihiku nlo.

<sup>232</sup> Ame aka yoomi, awo aarowa vano, ni awo yaari muthiyana mmosa ootikiniha saana. Ni owo yaari, moosuwela, ntoko muHinti nuusu, ni yaari ootikiniha. Masi mwa yeeyo awo yaari mutthu ahaaloha. Masi miyo nkinoona... Awo yaarina sooloha xexe wala thanu, ekumi aya yothene. Masi khula okathi yaalohaaya yooloha, yaakhala ekeekhahi. Awo yaloha etthu, yaari ekeekhahi.

<sup>233</sup> Kinnuupuwela emaara emosa kipaceryaka-ru olaleerya, miyaakha sinci-ene khalayi. Hiyo naakhala wenna nno ephiro yeela, osulu nno vakhani. Miyo kaalaleya vaava ekereja yeela. Vano khuloha, wira miyo keemenle va vakhiviru va ixikatta tthaaru. Ni keemenle, kaalaleeryaka atthu othene, wira yaahaana owela ixikatta iya tthaaru ehinatthi ophiya rampha muulupale. Ni muramphani muulupale naahikhala nliinya nikhaani nooteela ntoko nluku noowaarya, naarowa ovenya wene olukama mi-mi-mikhora sa Wirimu, mpakha vamukhora va nluku noowaarya. Nto nluku nlo noowaarya naahookoliwa mpakha ophiya vasulu va ixikatta iya. Owo vekeekhai Mutthaka aka olelo: okhalihwa naxariya, oreerihwa, opatiiso wa Erooho Yoowaarya! Nto miyo kaahimya wira mutthu ohaana orwa ovira ixikatta iya tthaaru, wira owerye weetta ephiro eyo yuulupale. Nto khwira wira... .

<sup>234</sup> Aahikhala muhano mmosa aavinre vaavale. Vano, moosuwela muthinto xeeni wa ixapattho atthu yaawarak'aya miyaakha miloko miraru ni mithanu sivinre. Aahikhala muhano mmosa aavinre vaavale, aawanre ixapattho soorakama ntoko sinwaraaya olelo, ixapattho sa maxittha oorakama. Nto owo khuvira. Nto miyo khwira, "Nwehererye minuutu mmosa, murokor'aka. Khamunwerya weetta ephiro ele yuulupale ni yeeyo." Ni miyo khwira, "Nyuwo-nyuwo, khamunwerya wira eyo."

<sup>235</sup> Nto owo khwira, "Ah!" Owo khwira, khwaalipela athiyana akina, khwira, "Muhiwaamini. Awo anamukhw'anepa. Munnona? Muhiwaamini. Miyo kinoowoonihani wira vanooweryaneya miyo okhalihwa naxariya, ooreerihwa, ni osarihiwa Erooho Yoowaarya, nave nlelo weetta siiso." Nto owo... Miyo khumuhiya arowaka paahi. Nkaakhanle-tho wiiraka etthu, nkaakhanle omweemexaka. Vano owo khutuphela muramphani. Nto owo khunweha munna muthiyana, khwira, "Moone, miyo kaahooleelani!" Khupacerya otthimaka, nto owo... .

<sup>236</sup> Moosuwela, ntoko Bibilia sihimale-awe, mwa Yesaya, kapiitulu 5, wira awo yaarowa okhalanaka "exiko

yoowookowa.” Ahaana okhala siiso; sikhanyaaya oomora, moone. “Aneetta yiinaka ntoko . . .” Awo ahaana wira, ahaana wiittikinya, “Anrowa yiinaka, arumihaka maxittha aya; moone, aana axithiyana a oSiyoni mahiku ookiserya.”

<sup>237</sup> Nto owo khupacerya otthimaka muramphani mme, voowaakuva saaweryaawe. Nto, nuuvira okathi, ephiro khukhala yootepa ephunyeyaka. Owo khupacerya orukurerya, ni wiina *siiso*, nto khurowa amorelaka epantte emosa.

<sup>238</sup> Nto amaama khwira, “Okhuwela wootepaxa woopiha kitonko aka wiiwa kookhalaru, aari muthiyana ole amorelaka mmalumini mmwe a mooro ni mwiixi, arowaka vathi, vathi siiso.” Khwira wira, miyo “khurukunuwa khwira, ‘Munnona?’”

<sup>239</sup> Owo aahiwelela itthu sothene ohiya Nuulumo nimoso, moone, itthu sothene ohiya Nuulumo nimoso. Vekeekhai, athiyana aPentekosite anoowerya woopowa, ooreerihiwa, ni osareya Erooho Yoowaarya, vano nto khuvonya. Voomalela. “Mutthu khankhala mukumi ni yolya paahi, masi ni Masu othene ankhuma.” Munnona? Munnona? Vano owo aahivonya. Nto ntoko sihimaly’aka, moone, owo aamwiira okenle, vooreera, masi, moone, owo aahivonya wiiwelela; omuhimeerya etthu yaari ohoolo. Ni Owo oolepa Ehapari yooreera ovira mw’awiixutti, arummwa, ni Mwiixuttiho w’arummwa ni maprofeta, ni sikina, nave awo khaniwelela.

<sup>240</sup> Vano nwehe Owerya nno woovaha ekumi, *Zoe*, oruhaka Masu, muupuwelo waari mwa Kristu ori mwa nyuwo nto. Miyo kimphavela owoonihani, wira, nyuwo, okathi ohihimunwe- anyu. Okathi Muluku omuhimunxe-awe Yesu mw’alipa- ookhwa, Owo ohoohihimuxani, nave. Ni ohoovahani ekumi okela mw’Ekumini, ni Yoowo, vano nyuwo moovahiwa ekumi okela mw’Ekumini, munaamwi okathi ule nyuwo mwaari mukhalelo paahi mmuyuupuweloni Sawe, masi Muluku aahoona sothene mwa Yoowo, woomalelani, moone. Okathi Muluku owehaly’awe erutthu . . .

<sup>241</sup> Erooho yaahimuhiya Owo, Omatta w’oKetisimani. Owo aahaana okhwa, mutthu. Muupuwele, apatthani, Owo khaarina wira yeeyo. Ole aari Muluku. Muluku aahittikitthela erutthu iyo, yeeyo yaari erutthu ya mutthu. Ni Owo khaa . . . Owo aawenle-ru, ntoko Muluku, Owo khaarowa okhwa enamuna yeeyo ya ekhwelo; khivanweryaneya omwiiva Muluku. Masi Owo khaarina wira.

<sup>242</sup> Masi, muupuwele, Owo aaronwe iwe ni nyuwo mwa Yoowo. Moone, Muluku khaanvalaaninhe Mwaakameliwa ni Mutheli, nlelo. Nto okathi Muluku owehalyaawe erutthu ya Kristu, Owo aawoonale oowaili mulopwana ni muthiyana. Yothene yaahivuluxiwa mw’erutthuni memmo emosa. Munnona? Awo mmosaru, mamosaru, Masu mamosaru. Masu mamosaru, onlavula Mutheli, onnilavula Mwaakameliwa.

243 Ahe, onwerya sayi Mwaakameliwa orwa, ni ohooniherya sothene silaiheriwe sa Yoowo; nto vanrwaawe Mutheli, nto Owo khaarowa okhala Mwaakameliwa? Masi Owo vairalyaawe sothene, hata ooniheryaka mwaha wo wiihihimuxa Mwaneene mw'alipa-ookhwa, nuumala, vano khori—Mwaakameliwa khorina wira etthu emosaru, khorina okhalaka voolikana ele Masu ahimme-aya wira Owo aamukhala mahiku ala ookiserya? Owo khorina yo ohokolowaka mwaha wa Malakhiya 4? Owo khorina wooniheriwaka ntoko saary'aya mahiku a oSotoma? Olumwenku khorina okhalaka siiso ntoko siry'aya? Itthu iya khasihiyo osuwanyehiwa woolikana wa Masu a Muluku ninsuwelihiwaahu?

244 Ahe, apatthani, koosuwela wira kinoopisihani okathi munci-ene, minuutu muloko ni mithanu mpakha olya wa ohiyu, masi khino kiniira kimalinhe-ene okathi uwo. Masi nwehe, nkawehani va, etthu xeeni yoolikana. Nkisuwenle liini onrowaaka owoonani-tho. Munnona?

245 Nkawehani, nwehe ela. Masi Muluku aahimoona Mwaakameliwa khalayi ene mwa Mutheli. Aleluya! Moone, wira amoopole Mwaar'awe, ntoko Atamu, Owo aahaana orowa ni Yoowo. Atamu aanisuwela etthu owo iiraawe; Hawa khaasuwela etthu iiraawe, masi Atamu aahikhuma vamosa ni mwaar'awe. Munnona? Nto Yesu aakunxe opuro wa Mwaar'awe khukhala etampi mwaha wa Yoowo. Muupuwele, Owo ohiikhaliha nyuwo, Owo oohaawa ehukhumu anyu, wira nwerye okhala voopuroni Vawe. Owo ohiikhaliha voopuroni vanyu, wira nwerye okhala voopuroni Vawe. Ophenta xeeni! Opatthana xeeni! Ninwerya sayi okhootta? Ninwerya sayi hiyo wira etthu ekina woohikhala omphenta Yoowo, mpatthani? Kaamuwerya okhala mwa yeeyo iwoora, masi nrowe nikelele ohoolo vakhaani-tho.

246 Ntoko musuwelelo wa pentekosite olelo, ni orwa wa Erooho Yoowaarya mahiku ala ookiserya, ntoko saalaiheriwe-aya, eri ntoko elepeliwo ya epaphelo y'ekhalanelo. Munnona?

247 Vano, nyuwo munoowerya okhalana epaphelo. Vekeekhai. Munnona? Nyuwo munoowerya okhalana epaphelo ya ekhalanelo y'etthu, masi eyo nlelo khenihimya wira ti yawinyu. Nnari, mulopwana. Mutthu mmosa a ottaiwene aamuwerya orwa ni ohimya wira ti yawawe. Masi mwakhalana elepeliwo, eyo enooniherya wira sothene saakhanle soovirikanya soofuciwa, mpakha ottuli w'ephattuwelo. Eyo ekeekhai?

248 Nto mutthu ahimya wira owo onnaamini Masu, vano nto okathi Erooho Yoowaarya enrwaaya, Eyo elepeliwo ya ekhalanelo. Ni eyo ennootthuniheryani, mwakhalanaru elepeliwo eyo, wira yothene eyo ti yawinyu, ni itthu sothene siri vaavo iyo ti sawinyu. Amen! Nto eyo enninivaha elepeliwo, okathi Erooho Yoowaarya enrwaaya mwa epaphelo ya ekhalanelo ela Muluku oonalyaawe wu ohinatthi opattuxiwa

olumwenku, khuhela nsina nanyu Muliivuruni mw'Ekumi; masi oyariwe ni mulopwana ni muthiyana, ni khukhala oowiiwelela etampi, ni oottheke mwaha wa etampi. Masi okathi waaminni aka Eyo, kihaakhela epaphelo; masi okathi Erooho Yoowaarya erwiiy'aya, yaari elepeliwo wira ithu sothene saari sookivirikanya miyo, yakhala etthu ame aka yiirale-aya, atithi aka yiirale-aya, apiipi aka yiirale-aya . . .

<sup>249</sup> Ntoko mwanamwane, nacile kinvekenle-aka, minuutu vakhani sivinre, ekhumme mw'axipwaapu awe. Ecile yaamurweenle, mwaana, ntoko sihimalyaaka.

<sup>250</sup> Masi vanrwaaya elepeliwo, Eyo yaahifuca, khwiipithiha sothene. Miyo ka ole orina elepeliwo nto. Amen! Ni voolikana ntoko Erooho emuhihimunxe Kristu mw'alipa-ookhwa, kookhalana epaphelo y'ekhalanelo wira ka epantte a Erutthu yeeyo, ni elepeliwo ya Erooho Yoowaarya yiirihaka erutthu iyo ya Masu okhala voolikana ntoko Eyo siiraly'aya mwa Yoowo, ntoko Owo silaihenryaawe nihiku nookiserya. Elepeliwo! Itampi saka sothene soofuciwa, itampi sanyu sothene soofuciwa, ni Ephome ya Yesu Kristu, nto Erooho Yoowaarya ehoorwa ntoko elepeliwo ya ekhalanelo Muluku okivahalyaawe ni mahala, mwaha w'osuwela khalayi ene. Oh, wulu!

<sup>251</sup> Munoova exeeni? Khivanxankiha Owo iiraly'awe, "Muhoove; Miyo ka Ole kaakhwiye ni kinkhala-tho; ni miyo kookhala vohimala-tho; ni kookhalana ihulelo sa mookhwaani ni omooroni." Muhixanke mwaha wa hat'etthu. Hata okhwa khoniwiirihani yootakhala. Nwehe. Ti yooereera!

Nrowe naakuve vano.

<sup>252</sup> Epaphelo y'ekhalanelo! Eteeni yoolinvwa. Sothene saavirikanya soofuciwa. Ha-ha-ha! Ovuwa! Pooti wira kiniira ntoko mulolo, masi kinoona oreera. Nwehe. Munnona? Oh, epaphelo y'ekhalanelo, nyuwo munnisuwela etthu eyo enihimy'aya? Nyuwo munnisuwela etthu enihimy'aya, munna? Khiivo hat'etthu enwerya okumiha mwa nyuwo. Amen. Miyo ka namakhalana. Amen. Exeeni e . . .

<sup>253</sup> Epaphelo y'ekhalanelo exeeni? Miyo vano kookuxa ntoko namattottela muraarelo, okhwa Wawe, ovithiwa, ni ohihimuwa. Owo ohiikhaliha miyo, wira kiwerye okhala Yoowo. Vano, Owo ohiikhaliha natampi, wira kiwerye okhala mwaana, amen, ni okhalana epaphelo ya ekhalanelo. "Tthiri ithoonyeryo iya sinimwaattthara ale anrowa waamini," moone, epaphelo y'ekhalanelo!

Vano naakuvaka, ehinatthi . . . Nihaana minuutu soophiyaka muloko tho.

<sup>254</sup> Nrowe niwehe vano, naakuvaka, ovaha ekumi wa Erooho. Kinrowa owoonihani ithoonyeryo imosa-imesa wira musuwele saana. Nkawehani, vano nwehe wira, "Owerya nno woovaha ekumi" waari mwaha aka. Numala Mwaana ohihimuwa,

nkawehani moota Eyo yaawiihale-aya ale oPentekositeni, etthu yaawiihale-aya, etthu Owerya iwo woovaha ekumi waawiihale-aya. Waahaavaha ekumi.

<sup>255</sup> Vano nrowe niwehe etthu Eyo yaamwiihale-aya Sitefano. Sitefano aahisareya Owerya woovaha ekumi. Khayaari siiso? Moone, owo aahisareya Owerya woovaha ekumi. Khiyaamukhalinhe oowoova. Owo iirale, “Nyuwo oolipa murima ni oohinnuwiihiwa mmurimani ni mmaaruni, okathi wothene munikhootta Erooho Yoowaarya; ntoko siiraly’aya axitiith’inyu, ni nyuwo muniira siiso. Tuuvi wa maprofeta yoonihenrye orwa wa Naxariya, axitiithi anyu ahinvonnye-aya ni maluku?” Oh, wulu! Yaahiira etthu mwa yoowo. Vekeekhai, owo aahisareya Owerya woovaha ekumi.

Vano awo khwira, “Hiyo nnimwiihuluxa mutthu uwo!”

<sup>256</sup> Nto vakhwiyaawe, awo, yaahinvyakasa ni maluku; nto muru awe woohaawaseya, maluku ammanaka siiso. Owo khuweha osulu khwira, “Kinnoona Erimu otthukuwa.” Owerya woovaha ekumi waavara muteko. “Kinnoona Erimu otthukuwa, ni Yesu eemenle moonno woolopwana wa Muluku.” Ti yeeyo Owerya woovaha ekumi waamwiihrenlyaya Sitefano.

<sup>257</sup> Nkanweheni mutthu mukina, aarina Owerya nno woovaha ekumi, nsina nawe aari Filipe. Owo khaareere osareya Owerya woovaha ekumi. Owo aarina muthukumano muulupale wu oSamariya. Axetwani yaamoomoliwa. Atthu yaampatisiwa mwa Nsina na Yesu Kristu. Awo jaarina muthukumano w’ekeekhai. Nto Erooho khulavula ni yoowo, oh, e—Eyeettiheryo khukhuruwa, nto Eyo khwira, “Muhiye muhakalaliho ola.” Masi arumeyi anrowa ohimya exeeni? Khivanvirikana etthu awo anihimyaaya. Munnona? Owo aahisareya Owerya woovaha ekumi. Owo aahikhalana kasoliina, ni e—Eyeettiheryo yaanimukhuruwela. Khwira, “Murowe mothakoni.”

<sup>258</sup> Nto owo khumphwanya mulipa-oohuliwa iwe, khumpatisa mwa Nsina na Yesu Kristu; mulopwana mmosa, aaroihale Mutthaka wEtiyoopiya. Eyo ekeekhai? Ni owo aahimwiiwelela Muluku.

<sup>259</sup> Omwiiwelela Muluku, vakhala wira khimunatoko opatisiwa mwa Nsina na Yesu Kristu, mwiire, nto nwehe Owerya woovaha ekumi woovenxani. Munnona?

<sup>260</sup> Okathi Sitefano iiraly’awe etthu ila yuulupale... ahiiso, kahi Sitefano. Masi Filipe vairalyawe etthu ila yuulupale, ohiya muhakalaliho ole muulupale ni khwiiwelela sooruma sa Muluku, aamalihenryawe, mwaha w’osariha... Mwaha wo ompatisa mulipa-oohuliwa ola, amwiiwelelaka Muluku, owo khaareere osareya Owerya woovaha ekumi mpakha omukuxa. “Eyo enoovaha ekumi erutthu anyu enkhwa, vakhala wira Erooho ela emuhihimunxe Yesu mw’alipa-ookhwa.” Eyo yaahinvaha ekumi Filipe mpakha vahooniwaawe khino imiilya emiya ni

miloko mithanu, nipuro nikina, elapo ekina. Eyo yaahivaha ekumi erutthu awe enkhwa. Owo iirale sayi? Owo aaroosareyaxa Owerya woovaha ekumi.

<sup>261</sup> Oh, Ekereja ya Muluku mukumi, hiyo khaninwerya weemela vamapeleni a esokhari ninkhalaahu naamwaka-vo va olelo. Nihaana okhala oosareya ni ovekelaxa, ni Owerya woovaha ekumi, mpakha ovaha ekumi wa Erooho Yoowaarya! Nihaana okuxiwa, nihiku nlo, Mookuxiwani. Ayo, mulopwana. Amen! Oh, wulu!

<sup>262</sup> Kileveleliwe nuulumo nlo. Miyo kaamuupuwela maama ompaka mirupa iye sikhaani, hiyo naarumeelakaahu, ni mwaana. Aмоса-amosa a nyuwo aximaama atokweene munnuupuwela yeeyo. Okathi ttuutthu aapaceryawe wunla; naakuxa ekafe vakhani yooxiliwa ni esokhari vakhani, oputaputela vanrupani ni omunuuliha vaavo, wira nimmaalihe paahi. Khasivo ikuru mwa yeeyo. Yaammwiiva. Munnona? Kafeyiina eyo mme, ni itthu, yoosivihiwa vakhani wira nimmirihe, wari onvaha kafeyiina.

<sup>263</sup> Hiyo noolamwa mwaha wa itthu ntoko iyo. Mutthike! Nyuwo mwa axawawe; mutthikele Masu! Mukhale a mwiitti; khiyaavo enwerya osikuliha miyoonelo sanyu, tivo mootaphuwa mwa ekwattulelo yothene ya mutthu. Etthu p'itthu mutthu noohimyanaaweni ya nthowa, eyo eniruuha-tho ophenta paahi. Amen. Nto, Owerya woovaha ekumi, oniroiha Wirimu, xawawe ovanve mpakha vasulu va alyakhu, osulu wu mapuro a Wirimu mwa Kristu Yesu! Oh!

Owo waari mwa Filipe. Waanvanhe ekumi, khumukuxa.

<sup>264</sup> Nrowe nimukuxe mutthu mukina. Aahikhala mulopwana aaitthaniwa Enokhi. Vano, owo aaheetta ni Masu othene a Muluku, mwa miyaakha soophiyaka imiya thanu. Owo aahikhalana onamoona, wira, "Miyo nkinatoko ovonya hata okathi mmosa Masu Awe." Owo aahisareyaxa Owerya woovaha ekumi mpakha Eyeettiheryo vamukhuruwenlyaya, Mmekaani, owo hata khaarina okhwaaka; owo aaroovenxiwa paahi orowa Owaani. Aaroopacerya weetta paahi. Owo khaareere... Ntoko Filipe, owo khaareere osareya Owerya woovaha ekumi, ohiya orowa oKaaza ni orowa nipuro nikina, weiwo, awo yaamphwannye-aya owo wu olimani. Ohiya orowa wu, owo aaroorowa paahi, oh, khwira, "Miyo ka mutthu oowuuluvala, khula enamuna. Kihaana Owerya wowaatta woovaha ekumi, kinrowaaka weetta paahi kikhume elapo ya vathi."

<sup>265</sup> Iwo ti Owerya omosaru woovaha ekumi hiyo orinaahu naanaano va. Moone, Owo onoovaha ekumi erutthu anyu enkhwa. Eyo kahi ekeekhaii? Ti Owerya woovaha ekumi.

<sup>266</sup> Enokhi, ni onamoona owo wooloka voomalela, wira, "Itthu sothene Muluku okileenle-awe wira kiire, kihiira.

Itthu sothene kiwenryaka woona wira Owo ookileela wira, kiihira.” Nto aahikhala oosareyaxa e—Eyeettiheryo, ahiiso—Mekaanika, mpakha, okathi Owerya woovaha ekumi ommanne aya, Mekaanika, waaronvenxa paahi. Owo aaheetta akhumaka elapo ya vathi, orowa Wirimu.

<sup>267</sup> Vano, vano nwehe, vanaasiwa Eliya. Nuumala... Nkawehani, Eliya, profeta ole muulupale, mulopwana nihiku nawe. Kileveleliwe. Munna mulopwana, muthiyana, nihiku nenlo owo aahaapwapwela saana athiyana ale owiipintari wiitho, maYesapeli ale ni maAkhabi. Nto khweemela mpakha... Nto khaavo, aakhala ntoko, aamweemererya yoowo. Ni owo aahipwapwela, aahivotha, ni khukhala oolipa vale, ni Muluku aahimukhapelela ni omukhaliherya mapuro othene. Moosuwela, mutokweene owo aahikhulumuwa nihiku nimosi. Owo khwira, “Kinimuuluvala, tivo nkinwerya okelela ohoolo.” Owo aarowa ophiyerya, woona waka, miyaakha miloko mithanu na mixexe; oowuuluvala saana, ni eettaka vale, ni owo khaareere osareya Owerya woovaha ekumi. Moosuwela? Owo aahiweha epantte ekina ya Yordani.

O Muluku! Miyo kinnihalela owerya woona epantte ekina. Khamunwerya?

<sup>268</sup> Oosareyaxa Owerya woovaha ekumi, mpakha, voonalyaawe ekaaro yoothukeleliwa iwe, ikhavallo kamosa-kamosa sa Mooro ni ekaaro ya Mooro, soothukeleliwa vamwirini iwe. Owo aaroolapuwa muro paahi khurowa Owaani, hata ahikhwiye. Owerya woovaha ekumi waaveleelihiwe, waahiiraha ekaaro okhuruwa okhuma Wirimu khimukuxa. Hata khurula ekhasako awe khimurihelela Eliya. Ti yeeyo.

<sup>269</sup> Vano, nto mwaapara owo khuttotta nlaya nlo, ethoonyeryo ya Ekereja tho, moone, khuttotta nlaya nlo. Vano, owo aahipaka vaara vaili miiriirya, yeeyo ekhanle ethoonyeryo ya Kristu ni Ekereja. Munnona? Eliya aapanke mixexe; owo aapanke mithanu na miraru. Moone, vano, owo aari—owo aarina owerya vaara vaili, okhala wira owo aavekenle siiso. “Itthu suulupalexaxa ovikana iya Miyo sinvaraaka nyuwo munoovara.” Munnona? Masi owo khaareere osareya Owerya woovaha ekumi, ni sothene, mpakha owo wira sothene iya, vaara vaili, seiyo Elisewu saapanke awe, ovikana ole saapanke awe. Ni nwehe, owo aakhala ekumi yoolipa mpakha miyaakha soophiyaka miloko mithanu na miraru wala miloko mithanu na mixexe, owo aahuuluvala nto owo—owo khukhwa. Owo aahikhwa, ni khu—khukuxiwa khusikhiwa.

<sup>270</sup> Moosuwela, ahe, Owerya iwe woovaha ekumi khiwaamuhiyale. Miyaakha, ni miyaakha nuumala yeeyo, okathi erutthu yinttale aya mmakhuvani mwawe, owo aari mmahiye. Nto awo yaamukunxe mutthu aakhwiye nihiku nimosi, ni khumooni nwanani, vano awo khimurihela mulopwan’ola



vasulu va makhuva a Elisewu. Waahikhala Owerya woovaha ekumi wowaatta mmakhuvani mme mpakha mulopwan'owo otthikela okumi. Oh!

271 “Onoovaha ekumi erutthu anyu enkhwa.” Hata ekhwaaka ni wuntta mmahiye, nnakhala vo Owerya iwo woovaha ekumi waaphwanyaneya vatthayani vale. Aleluya! Uh! “Ole omuhihimunxe Kristu mw'alipa-ookhwa nave-tho onnivaha ekumi erutthu anyu enkhwa.” Eliya wu, Elisewu ni Eliya. . .

272 Muupuwele, mulopwan'ole ookhwa, profeta ole, oosareya Owerya iwo woovaha ekumi, aaphwanyaneya mmahiye oowuntta; khiwaareere Owerya woovaha ekumi, mpakha, variheliwaawe mutthu ookhwa mwa yoowo, owo khutthikela okumi. Owo nlelo aaniwerya owiixaatherya matata aretta, khaawerya? Amen. Eyo vo.

273 Nto muupuwele, hiyo n'erutthu ya erutthu Awe, Yesu Kristu. “Hiyo na erutthu ya erutthu Awe, ni makhuva a makhuva Awe.” Oh, khiyaavo hata enamuna ekina. Ninoorowa ohihimuwa, nto ti yeeyo tu. Munoorowa ohihimuwa, ti yeeyo tu.

274 Paasikha onnihimyaxa etthu ovikana elimalelo paahi. Eyo ti ya olelo nave-tho, okhala wira irutthu sahu sinvahiwa ekumi vamosa ni Yoowo ni hiyo nikilaanthe mapuro a Wirimu.

275 Ni erutthu ela pooti wuntta mphareya; pooti wuntta mutthayani; pooti ohikhala hata ekhwiyeri y'ettuurwa; masi enoohihimuwa. Okhala wira, Erooho emuhihimunxe Pwiya aka mw'alipa-ookhwa yoovaha ekumi erutthu ela enkhwa. Yoovaha ekumi erutthu anyu enkhwa. Ni hiyo n'alipa-oottotela muraarelo a ohihimuwa Wawe, enamuna Awe ya Ekumi Ehinimala kihinreere-aka ohimya, moosuwela. Khivanxankiha Owo ohimalyawe wira, “Muhoove.” Owo aamusuwela.

276 Okhala wira ntoko Paulo sihimaly'awe, “Okhwa, mpwino anyu ori yayi? Mahiye, oxintta wanyu ori yayi? Koosareya Owerya woovaha ekumi. Nimuxukhuruku Muluku, Yoowo onnivaha oxintta mwa Pwiya'ahu Yesu Kristu.” Ayo, mulopwana! Owerya woovaha ekumi. Oh, wulu!

277 Owo onkhala voohimala-tho, “mmosaru nsana, olelo, ni mahiku othene.” aHeperi 13:8. Nwehe, Mesiya, Ole ootitiktheliwa; ti siiso Mwaakameliwa Awe, aMesiya akhaani, moone, Ole ootitiktheliwa.

278 Nwehe, okhwa khonimaliha Owerya wa Muluku woovaha ekumi. Okhwa khonwerya weemexa. Mwakhalana Owo, Ti Woohimala. Khiyaavo hat'etthu enrowa weemexa Owo. Khivanweryaneya weettiha; khinweryaneya—khinweryaneya wiiriha hat'etthu. Munookhala ekumi anyu mpakha woomalelani, eyo nlelo kheneemexa Owo; onookelela ohoolo wooloka.

279 Nwehe, Moise aahisareya Owerya iwo woovaha ekumi. Khiyaari siiso? Owo aari profeta yaamurweenle Masu. Owo aari epantte ya Masu. Owo aari Masu a nihiku nenlo. Eyo ekeekhahi? Nto vaamanly'awe okhwa, nuuvira miyaakha imiya thanu na tthaaru, Omwaako wa Orukunuwa, owo eemenle vale, ni Eliya. Eyo ekeekhahi? Owerya woovaha ekumi, okhwa khommalamaliha. Nnari, nnari. "Miyo kinoomuhihimuxa." Malaikha yaahirwa; khimusikha vathi vale veekhatoni. Owo aahintta ni khumalamala, makhuva awe yaahimalamala, ni itthu sothene sikina, masi Owerya woovaha ekumi nlelo waari vaavale. Waahinvaha ekumi khunvenxa. Nto owo aari vale, eemenleene vale. Nwehe.

280 Nyuwo muniira, "Eyo ekeekhahi, Munna Branham, nuuvira miyaakha imiya thanu na tthaaru?" Oh, wulu!

281 Mwasomaru mwa Matewu, kookhalana Yoolempwa, Matewu 27:51. Mulepeke, mulepe. Okathi ale othene ottuli wu, yaaminni wira Owo aamoorwa . . .Bibilia oohimya va, Owo varwiiye-awe, awo yaamurupa vatthayani. Owerya woovaha ekumi waari mwa yaawo, ni awo yaari epantte ya Yoowo, masantu ale. Awo yaari epantte ya Yoowo, okhala wira awo yaahimwaamini Owo.

282 Vooweryaneyya awo yaahikhalanasa Ekumi ile, mwaha wa mukuttho wa epwittipwitthi, ettipiheryo, yoowo wahaaweryaneyya erooho ya epwittipwitthi otthikela-tho mwa mutthu. Ankhi vano ni Erooho ya Mutthu, Muluku Mwaneene, mwa nyuwo, moone, Oweryaxa xeeni woovaha ekumi orinaahu! Masi wira ettipihawe etampi mwaapwittipwitthi aahivahiwa, mwa ethoonyeryo. Erinaahu kahiyo ethoonyeryo; elikaniheryo. Ninoova exeeni? Nto ale jaarina ethoonyeryo paahi, ethoonyaka ohihimuwa Wawe, nave khurowa mmahiye ni yeeyo.

283 Ntoko Yobi wu aviraka mooxankani mwawe wuulupale, wulu, itthu sothene aahaakhiwa! Xetwani iirale, "Mukihiyerye. Kinoomwiiriha owo wootakhalihani ohoolo Wanyu." Vano nto owo aari ootaphuwa.

284 Khwira, "Muhikuxe ekumi awe." Nto owo khwira (owo) sothene masi muhikuxe ekumi awe.

285 Ni hata amwaar'awe yaahimurukunuwela. Khwira wunkha wa mwaano mwaya waahimphweela. Mwa moolumo makina, awo—awo khayaarowa okhalana naata n'uwo. Awo khiyaakhala ntoko wira yaanimphenta, yaammukakha. "Yobi, mootakhaliwa! Xeeni nyuwo ohimutakhalihaka Muluku, mukhwa?"

Khwira, "Nyuwo munlavula ntoko muthiyana oovahuwa." Oh, wulu!

286 Moone, owo aahikhala oolipa ni ele aarinaawe. Vano, owo aari profeta. Owo khwira, "Miyo nkihiyo ka natampi. Miyo koovaha mukuttho woovaheriwa." Amen. Owo aanisuwela vatthu vaary'awe. Owo aari mwa Masu. Voohicala etthu

akina yaahimy'aya, owo aari voolikana mwa Masu. Nto okathi ule wowoopiha...Khwira, "Nyuwo munlavula ntoko muthiyana oovahuwa." Owo khwira, "Apwiya ti yaakivanhe, Apwiya t'akunxe; vano, nittotopeliwe Nsina n'Apwiya!" Khwira, "Miyo kirwiiye olumwenku ula kihirina ethu. Kirwiiye, kihivanr'ethu, miyo kinkhuma enamuna emosaru. Nittotopeliwe Nsina n'Apwiya!" Okilaanthe-ene vale, simukhumme ithuku, an'awe akhwiye-ene, owo aahihaawa, ni apatthani awe othene yaahimurukunuwela, mamempuru a mukereja mw'awe, itthu sothene sikina, aiwakaka ni e... Ni namuhaawi saana ni ootakhaliwa! Khaavo hata mmosa a nyuwo otonko ovira mwa yeeyo. Nlelo, owo aahivarelela Masu awo.

<sup>287</sup> Owo aari xawawe. Oh, wulu! Khivanweryaneya okhaliha ettiyelo wiitho wawe okathi wothene. Nnari, nnari. Naanaanoru, eemenle-ene oolipa ni Masu awo, exeeni yiiraneieye? Osulu waahithukuwa, itari khupacerya oruma, overunya khupacerya okukutteya, nto Yobi khuweha osulu khoona yoowoona ene, khwira, "Miyo koosuwela wira Nvuluxa aka ookhala. Mahiku ookiserya Owo onoovenya elapo ela. Ni hata axiitthu a musapalani aroohonona erutthu ila, makhuva ni sothene, Owerya iwe woovaha ekumi onookhala vaavo. Kinoomoona Muluku mmansaka, Yoowo onrowaaka omoona mmansaka. Maitho aka anoonweha ni kahi mukina." Eyo ekeekhai? "Hata isyo saka nuumala ophunyala mwa miyo, hata wira axiitthu a musapalani ari mweerutthuni mwaka vano, anoopwetexa."

<sup>288</sup> Moosuwela, axiitthu khanrwa wa nyuwo. Mwaaxiitthu owo ori mwa nyuwo, axiitthu musapalani mwanu yeenyu. Mootoko oweha yeeyo? Munooheleliwa mukaxawuni, ni ottiyeliwa wira ehivire ettheke; axikokho animookhuurani, siiso, okhala wira awo ari mwa nyuwo. Nyuwo murina axikokho, opacerya wene, mpuwa.

<sup>289</sup> "Hata axiitthu a musapalani, axiitthu a musapalani mwaka ekipwetexaka, erutthu aka, nnakhala vo n'erutthu aka kinoomoona Muluku."

<sup>290</sup> Nto voosiisu ule wo ohihimuwa! Ovuwa! Aleluya! Matewu, namalepa ola muulupale, 27:51, ohimnye wira, "Nuumala Owo ohihimuwa mw'alipa-ookhwa, wira masantu a Waataana Wa Khalayi, anci-ene w'ale jaarupa vatthayani v'elapo, yaahikhuma mmahiye, khukela mmuttettheni khwaakhumelela anci-ene." Owerya iwe woovaha ekumi, nlelo mmakhuvani mmwe mwa Eliya okathi wahaakhanly'aya-tho hata makhuva, nlelo mwa Yobi okathi wahaakhanle-aya ekhwiyeri ya ntthupi na erutthu awe. Masi Owerya woovaha ekumi nlelo waari vaavale.

<sup>291</sup> "Vakhala wira Erooho ela emuhihimunxe Yesu mw'alipa-ookhwa enkhala mwa nyuwo, Owo nave-tho onoovaha ekumi arutthu anyu enkhwa." Nwehe, naakuvaka vano.

292 Nyuwo muniira, “Oh, kaanithhuna kikhanle-ene wu...” Munkhala okathi wooreera. Vano nyuwo othene...

293 Kinniwoonani mulepaka Soolempwa kamosa-kamosa. Vaareera, mulepe aTsalonika Oopacerya 4:16. Nwehe moota ereeraly’aya, moone. Mwa... “Masantu, ale anrupa mwa Kristu, Muluku onimwaaruha ni Yoowo,” moone, masantu mmahiye, amumulaka. Ntoko Eliya saary’awe; akina ntoko Elisewu saary’awe; moone, akina aya anoovahiwa ekumi, akina anookuxiwa, akina anrowa okhala mmahiye. Awo anoorowa ni Yoowo. “Nlope na Muluku ninooruma, nto ale akhwiye mwa Kristu t’anrowa opacerya ohihimuwa. Nto hiyo ninrowa ohala nry’ene akumi ninrowa okuxiwa vamosa ni yaawo, wira nakumane n’Apwiya osulu.” Owerya woovaha ekumi mwa ale ankhalala; Owerya woovaha ekumi mw’alipa-ookhwa. Munnona?

294 Owerya yoowo wa Muluku woovaha ekumi woowooniheriwa mwa maprofeta ala aili. Nkawehani masina aya, t’ohalela olikana, Elisewu, Eliya. Munnimoona Mwaakameliwa ni Mutheli? Mmosa aya ti Mwenye Yesu; mukina ti Muhano Yesu. Moone, ntoko siiso, paahi—paahi eriyari ya—ya Mulopwana ni Muthiyana. Munnona?

295 Eliya, nto nkawehani moota enooniheriwaaya va. Vano, Elisewu... Aarookuxiwa mookuxiwani, onthoonyerya Ekereja, vaareera, Eliya; nto Elisewu aahimumula mpakha ohihimuwa. Munnona? Vekeekhai eri ntoko mwaapalame, antthuneya mapupha maili wira ailipiherye mmansawe. Munnona? Ekereja yaathoonyeriwe vaavale vale mwa maprofeta ale aili. “Okhala wira hiyo ninrowa ohala nryeene akumi nihiku ninrwaaya Apwiya, khaninrowa waakhoottiherya ale anrupa; okhala wira Nlope na Muluku ninrowa oruma,” mapupha oomaili anookhala vamosa, nto ninoorowa nivavaka, aleluya, aluluya, ninoorowa nivavaka. Okhala wira, (exeeni?) mwa akumi, wala ookhwa, Owerya iwo woovaha ekumi nlelo onnikhala.

296 Nwehe. Muupuwele, muupuwele vano, oovahiwa ekumi wira noone itthu iya exeeni. Nkawehani Owerya woovaha ekumi wa nihiku nla. Muupuwele, hiyo noovahiwa ekumi. Woohikhala khalayi, wo okhaliherya...

297 Ni miyo—miyo kinoona wira Pwiy’ahu ohimmye wira, ni Paulo oohimya, “Ele Atithi akoonihale-aya, nkihin’ye etthu kihooleenlyaakani. Kinimooleelani.” Ni mahiku ala ookiserya okathi woonaly’ahu Owerya Wawe woovaha ekumi mwa hiyo, Owo hata oonivaha Owerya woovaha ekumi, wira niwoone aretta ovonihiwa. Nihoona Owerya Woovaha ekumi ovaraka muteko eriyari ahu, ntoko saaryaaya okathi ule mwa awo mahiku oopacerya, moone, ninnoona wooniherya mwa yoowoona ni waahihimuxa alipa-ookhwa, ninnoonaka Owo waavoniha aretta.

298 Nihiku nlo miyo kaamuleela mutthu, Donavon Weerts nno, kinoona wira nyuwo othene munnimusuwela. Miyo kaamuxaya ni yoowo. Mwammiravo oohaawa . . . Owo mwammiravo ooreera murima. Owo onnoorwa vaava okereja. Owo ono . . . Mpatthani aka ooreera murima. Nto owo pahi . . . Owo khwira, “Nkaatthuna woohaaxani.”

299 Miyo khuweha, nto niyaru nawe, naaroorukunuwa, muhina waakhumenle ota. Nto miyo khwira, “Ehaali anyu, Donavon?” Khunvara ntata paahi, *siiso*, aari kankuru. Miyo khwira, “Donavon, exeeni eniwiirani niyaru nanyu?”

300 Owo khwira, “Nkisuwenle, Munna Branham. Miyeeri soophiyaka mithanu na mosa, mithanu na miili, nintthikela nikhhalaka . . .”

Miyo khwira, “Mwahaahimerya-ni etthu ya yeeyo?”

301 Khwira, “Miyo—miyo nkaatthuna woohaaxani, Munna Branham.”

Miyo khwira, “Moosuwela exeeni iyo?”

Khwira, “Kinnuupuwelela.”

302 Miyo khumpweherya ntata naka paahi, khuhihimya hata nuulumo nimos. Mahiku maili nuumala yeeyo, khiwaakhanle hata murla mmosa. Exeeni iyo? Owerya woovaha ekumi, moone, Owo onoovaha ekumi erutthu anyu enkhwa. Niyaru nawe naamukhuureya, ottooporo awe waamuhononeya, moone, owo aamwiira okhwiye. Masi, Owerya woovaha ekumi! Munnona?

303 Nto nihiku nimos okathi waari-aka ookhulumuwa, yoomi, ntoko . . . miyo khwira, “Nyuwo mwa . . . Mmiravo, vanreerela mwiire etthu, murina miyaakha miloko mithanu. Nyuwo, mwaarowaka owiirela etthu p’itthu Apwiya, vanreerela mwaakuve mwiire. Munimuuluvala.” Munnona? Nto vale voosiyo yoowo, Owerya woovaha ekumi waahirwa, nto Owo khukitthuniherya oweha epante ekina y’ekuwo, nto miyo kiwoonani othene anyu weiwe. Uh-huh. Munnona? Owo khwira, “Sothene mutonko anyu ophenta, ni sothene soophentaleni, moovahiwa.” Munnona? Kaahiwoona othene aya iwe siiso. Yaari exeeni iyo? Owerya woovaha ekumi.

304 Yohani mulipa-oowuupulula aahisareya Owerya woovaha ekumi, eemenle khoona emalelo okhuma wopaceryani.

305 Yesaya aahisareya Owerya woovaha ekumi, aaheemela khoona eMileeniyo ni sothene.

306 Owerya woovaha ekumi! “Nto vakhala wira Erooho emuhihimunxe Kristu mw’alipa-ookhwa, enkhala mwa nyuwo, Eyo enoovaha ekumi erutthu anyu enkhwa . . . erutthu enkhwa.” Muupuwele, Owerya woovaha ekumi!

307 Nkawehani itthu sinoonaahu nihiku nla. Owerya woovaha ekumi woophiya wa hiyo, wira otthukule Ikanyeryo Thanu na piili. Yaari exeeni iyo, osuwela wa mutthu? Nnari, Owerya woovaha ekumi wa Muluku. Moone, Owerya woovaha ekumi wa Muluku waahihimya khalayi ene wira ela yaamwiiraneya. Moone, Owerya woovaha ekumi wa Muluku ohiiriha olumwenku okhalela onamoona, wira eyo Ekeekhaii. Nlaikha n'Apwiya, kaahooleelani, naari vakhiviru, Munripuni na Mooro; Owerya woovaha ekumi wootthuniherya olumwenku okhalela onamoona wira Eyo Ekeekhaii. Ni, mwa yeeyo, awo khayaasuwela yaari exeeni Iyo; nto hiyo naahisuwela, oweha paahi epantte *ila* nno, nto vale ari Apwiya ahu, moone.

308 Awo ti Ale atthukunle Ikanyeryo iye. Awo ti Ikanyeryo iyo, maana Masu othene a Muluku ti Kristu, ni Kristu ti Ikanyeryo sitaphuliwe. Otaphuliwa wa Ikanyeryo exeeni nto? Kristu oowuupululiwa.

309 Ni Malaikha ale mathanu na manli, yaathoonerya Ikereja Thanu na piili sothene soomalela, ni hiyo khanaawerya nnakhala woona. Awo ti yiirale, awo aakumiha elatarato, kahi hiyo. Nto Owo ori vale, eemenleene vale, Mphuki Muulupale; ooniheryaka wira Owo ti Alfa ni Omeka, ephattu ni emalelo. Wiisuwanyeiha xeeni! Owerya woovaha ekumi wooniirela eyo hiyo.

310 Owerya woovaha ekumi onninitthuniherya woona orwa Wawe. Owerya woovaha ekumi woonikumihya mookhwaani khunikeliha mw'Ekumini. Owerya woovaha ekumi onnivaha olamula sa mmurimani; wira nisuwele exeeni evonyeiye ni nyuwo, ni ethu yo wira; ethu mwiiraly'anyu, ni ethu mwahaarinaanyu wira; ni ethu yaatthuneya nyuwo wira, ni ele enrowaanyu okhala. Owerya woovaha ekumi, itthu iya sothene!

311 Pwiy'ahu Yesu t'osareya Owerya woovaha ekumi, Owo aari yothene Eyo, vamosa. Owo aari oosareya Owerya woovaha ekumi, Owo aahimye ela, "Mpwetexe erutthu *ila*, nto Miyo kinoovenxa muhina mwa mahiku mararu." Ororomela xeeni mwa Owerya woovaha ekumi! "Mpwetexe erutthu *ila*, nto Miyo kino...emp'ela, nto Miyo kinoovenxa muhina mwa mahiku mararu."

312 Vano, Owo aahimenrye-ni yeeyo? Owo aahisuwela wira eyo yaahilempwa mwaha wa Yoowo, moone, wira yaahilempwa mwaha wa Yoowo, ni Masu a Muluku yaawo vahaaweryaneya ovonya. Masu ahimye wira, "Miyo nkinimuhiya Oowaarya Aka wuntta, nnakhala nkinihiya munepa Awe mookhwaani." Ni Owo aanisuwela wira Owerya iwo woovaha ekumi waamurowa onvenxa, wira khiyaarowa okhala hata erukuruku emosa yoowuntta.

313 Owo khwira, "Mpwxakase emp'ela, nto Miyo kinoovenxa-tho muhina mwa mahiku mararu."

<sup>314</sup> Mwaha wa xeeni? Yaari elaleeryo y'eprofeta, Masu a Muluku. Ni oprofeta, wakhalaru wira Masu eekeekhai a Muluku, khanivonya. Ni oprofeta mmosaru ni Masu a Muluku yaahimye wira Owo aamurowa omuhimuxa, onihimya wira hiyo noohihimuwa ni Yoowo. Khivanxankiha Owo iraly'awe, "Muhoove." Ni yolempwa, wira, "Eroho eri vano, yaari mwa Yoowo, vano eri mwa hiyo, ni ennivaha ekumi erutthu ahu enkhwa." Muhoove, mpatthani, M-a-a-n-a oovenya. Mwaana oovenya. Nnari. . .

<sup>315</sup> Vano nkawehani woorukunuwani. Hiyo naari, khula mmosa, naahooniheriwa vaavale. Vale yaari masantu akumi yaakuxiwe, aari Eliya eemenle vale; ni vale aaphwanyaneya Moise eemenle, masantu yaakhwiye yoonihe-. . .Nave-tho, oowanli aya yaanikhalana Owerya woovaha ekumi. Hata wira mmosa aahikhwa, nto mukina khaakhwiye, othene jaarisa vaavale.

<sup>316</sup> Nwehe, oh, nkawehani etthu ninooaahu vano mahiku ala ookiserya. Etthu ene yeeyo Owo olaihenryaawe, Yohani 14:12. Vano nkawehani. . .[Nipuro vahitthu mufiitani—Mol.] Vekeekhai.

Atthu aniira, "Munihimya okhalana owerya?" Nnari, nnari, nnari.

<sup>317</sup> Hiyo vekeekhai nri ntoko ale oMwaako wa Orukunuwa, moone. Vekeekhai, hiyo khaninihimya okhalana owerya. Masi, hiyo, ntoko—ntoko awo saary'aya. . .Omwaako wa Orukunuwa, awo khayaahimya wira, Moise, ohimya wira, "Moone, nkakooneni miyo ki pani," awiixutti wira, "nkakooneni miyo ki pani, nkoonani miyo ki pani." Moosuwela yaakhumelenle? Nwehe, awo yaamoonale Yesu ovuwihwiwa. Ti yeeyo tu yaatthunasaaya wona wooniheriwa, Yesu ovuwihwiwa.

<sup>318</sup> Nto ti siiso eryaaya olelo, hiyo kxanimphavela okhala mutthu muulupale. Hiyo khennicala etthu atthu annihimyanaya. Nsina nahu khanihiyo etthu; ti Nsina Nawe. Ekumi ahu, kehiyo etthu; ti Ekumi Awe. Ti Owerya Wawe, kahi owerya wahu. Ni eri etthu emosa paahi hiyo ennisivela wira, omoona Owo ovuwihwiwa. Nto enweryaneya sayi? Okathi Owo onvuwihwiwaawe mwa hiyo, mwaha wo ohihimuwa Wawe ori mwa hiyo. Hiyo ninnimoona Owo wooniheriwa-tho ntoko Owo saaryaawe, olelo.

<sup>319</sup> Muhiiwa saana yeeyo? Moone, otthuna wahu khuhiyo ovuwihwiwa. Otthuna wahu khanihiyo nsina nuulupale. Otthuna wahu khuhiyo ottittimiha ekereja khata, wala wunnuwiha exikola ya Ttiminku, wala ophavela waaruuha atthu, vowaakhanyererya, waapurula, mwaavahaka meera, wala oruuha ittheneeri, itthuvo, wala etthu ntoko yeeyo. Iwo kuhiyo otthuna wahu. Otthuna wahu omoona Owo ovuwihwiwa. Ovuwihwiwa, (exeeni?) kahi ni wiisoona; masi

mwa hiyo, makhalelo ahu, wira nooniherye wira Owo mukumi ni onkhala mwa hiyo.

<sup>320</sup> Miyo kawerya-ru okhuma mphironi, wira William Branham ohuupuweliwe, ni nnakhala nyuwo muhuupuweliwe, mpakha niwerye omoona Yesu ovuwihwa eriyari ahu. Omoona Yoowo, iwo p'utthuna wahu. Eyo ti e . . . enninivaha Owerya woovaha ekumi. Ni onninivaha ohakalala, osuwela wira hiyo nri ni Yoowo, erutthu ni makhuva sa Yoowo, nikhalaka Mwaakameliwa Awe; ni woona inamuna Sawe imosaru soolipiheriwa, ooniheryaka mwa hiyo wira Owo oohihimuwa mw'alipa-ookhwa. Munnona?

<sup>321</sup> Khivanxankiha Owo iiraly'awe, "Muhoove", tthiri vano, nwehe, hiyo noovuluxiwa ni Yoowo, nto vano oohihimuwa ni Yoowo. Ti yeeyo enihimya Paasikha wa atthu, "oohihimuwa ni Yoowo"! Nwehe. Vano hiyo nookhalana Eroho Awe mwa hiyo, epaphelo ya ekhalanelo yoolinvwa voomalela.

<sup>322</sup> Nnari, nyuwo muhiireke, "Ahe, miyo kinroromela wira kinoophiya." Nyuwo moophiya. Kahi, "Miyo *kinoorowa* ophiya." Miyo koophiya. Miyo nkinaphiyeke; Owo t'okiphiihale. Munnona? Kahi miyo; Owo! "Ahe, Munna Branham, awo aniira . . ." Nkincala etthu awo anihim'aya. Iwe Owo ookiirela, miyo. Eyo ti yothene entthunaaka, enikicala.

<sup>323</sup> Miyo paahi—miyo kintthuna kimoone Owo wooniheriwa. Munwerya sayi wira, omwiitthana wira akhuruwe? Nnari. Owo ori mwa nyuwo. Moone, Owo ori mwa nyuwo. "Ahe, nto, Pwiya, kawerya-ru okhuma mphironi, Nyuwo munoowerya wiisooniherya. Mmansaka . . . Munwerya sayi Nyuwo wira? Okhala wira Nyuwo mookhalaha siiso. 'Othene ale Atithi akivahaly'aya animoorwa.'" Nwehe. Ovuwa!

<sup>324</sup> Ni mooniheryo owo wothene otthukanyiwe, ni hiyo vano voosiis'ula, oh, kinuupuwela nsipo nle:

Voosiis'ule wo ohihimuwa,  
Mikhoyi sa okhwa sataphuliwaru,  
Ninoohihimuwa, (Aleluya!) ninoohihimuwa.

<sup>325</sup> Munnaamini yeeyo? Ninoohihimuwa! Mwa Yoowo hiyo ninkhala epantte ya Yoowo, Paasikha, esiiri ya Muluku yoowuupululiwa ntoko saaryaaya okathi ule, y'Ekumi nuumala okhwa. Hiyo vano n'akumi, hiyo naatonko okhwa mutampini ni sootheka. Ekanyeryo y'ekeekhai ya Paasikha yookumiha okhwa vasulu vaka, nto miyo ka mukumi. Ekanyeryo ya Paasikha, wopaceryani, yootaphula ekanyeryo ya ekanyeryo ya oRooma, Ekanyeryo ya Paasikha, Owo aatthukaniwaawe. Ni atthu, okathi yaakhwaaya, yaammalamala; masi Owo ootaphula ekanyeryo khuupulula esiiri. Nto vano Muluku, ni Eroho Awe Yoowaarya, ootaphula ekanyeryo mmakhaloni mwahu, ni Kristu onnuupululiwa Owo akhalaka mwa hiyo, tthiri vano hiyo ninvahiwa ekumi ni Yoowo. Oh, nikukhu nnikukhu!

Ninoohihimuwa, (Aleluya!)



Ninoohihimuwa! (Amen!)  
 Voosis'ule wo ohihimuwa,  
 Mikhoyi sa okhwa sataphuliwaru,  
 Ninoohihimuwa, (Aleluya!) ninoohihimuwa.

326 Oh, khamuntteeliwa murima! Miyo nkireere otteeliwa murima! Iwe, munipanttani nikhaani na makhala voosisu omosa, ikanyeryo saahitaphuliwa, nto miyo khuhihimuwa ni Yoowo, yoopattuxiwa esya. Owerya Wawe woovaha ekumi; Mwaana oovenya.

327 Woohikhala khalayi, koothariheliwa ehantisi ekhaani ya mu—mulipa—oomesa. Mulopwana mmosa aahirwa onvekela mlipa—oomesa mutokweene wira amuroihe amese ihopa Olimani Onkela nsuwa. Awo khukhuma voosis'ule.

328 Akhala a nyuwo otonko ommesa salamawu, vano, munnisuwela eniiraneya, ankhala mahittette oowaatta iwe. Kinnimoona mwaamunn'aka, Eddie Byskal, iwe, misiyonaariyu a aHinti iwe. Ni hiyo naahimesa, vooreera, mmattimani mmwe.

329 Vano mulipa—oomesa ola aari oopacerya wiixutta, moosuwela. Owo aaroorowa omesa, vano awo khurowa ottaiwene. Alipelelaka oxa, moosuwela. Nto awo—nto awo khiyaawerya—tho wiiwa epusina ya mahittette, nto mulipa—oomesa ola khuxanka othene, khwira, “Eyi, ninrowa ophareya woowiixa! Heyi!” Khukhala ooxanka othene.

330 Owo khwira, “Mukilaathi, mwan'aka. Mukilaathi.” Mulipa—oomesa mutokweene, oomaala, moosuwela. Owo aahisuwela etthu aahimyaawe. Khwira, “Mulipelele paahi mpakha nsuwa nikhume, nto ninoowerya woona varyaahu.”

Nyuwo muniira, “Kihaana okhala Mmetotista? muPatista? muPentekosite?”

331 Mulipelele paahi. Mwaana akhume, ninimoona vatthu varyaahu. Owo ti Masu. Mulipelele mpakha moone Masu wooniheriwa, yaaryelaka Epyo, Ehupu yoohakhinyiwa, ninimoona varyaahu. Munnimphenta Yoowo?

332 Kileveleliwe mwaha wo woopisihani siisa. Akavi a nyuwo anrowa ohala ohiy'ula? Oh, nitthike—tho paahi, ohiy'ula, moone. Voophiyaka iwoora thanu na piili? Mwaahikhalana mutthu mukina? [Munna Neville oniira, “Nnari.”—Mol.]

Nrowe nuuramihe muru.

333 Ookhala mmosa va, wala anci-ene, ahirina Owerya nno woovaha ekumi? Mwaana ohaarya, nyuwo mukilaanthe mutapernakulu mu, muhiwa ifiita, nave nlelo Erooho khiyoovanheni ekumi mukhanlyaanyu ottharaka Masu a Muluku, wira nyuwo athiyana ni nyuwo alopwana nwereyeke wiiwelela Masu othene Owo olempe—awe! Oh, eyo etthu yoowoopiha. Ankhi mwaakhanle epyo yookhwa, ehikhanle Ekumi mwa nyuwo? Masi yookhala etthu mwa nyuwo,

enooleelani wira, “Miyo—miyo kintthuna kihihimuwe, voosiis’ula. Kintthuna kihihimuwe okhuma mukhalelo oryaakamo. Nkintthuna okhala epyo yookhwa paahi, ohiiwa ni etthaya matoro oophempa. Kintthuna kihihimuwe.”

<sup>334</sup> Munnitthuna ovenxa ntata, mwiire, “Mukivekelele, munna”? Muluku ooreeriheni. Muluku ooreeriheni. Wulu, nkawehani matata; khiyaavo enamuna nnakhala yo wiitthana waltaari. Ele eniitthanaahu wiitthana waltaari, atthu jaarwaaka waltaari, miyo nkineemereryaxa eyo, khula enamuna. Eyo yaacereriwe mukereja okathi wa muhakalaliho wa Metotista. Munnona?

<sup>335</sup> Bibilia ohimye wira, “Othene ale yaamini,” moone, “yaanipatisiwa.” Yookhala etanki va, yoosareya maasi, emmulipelela namwiivaha olikanne wira okhwe mmansawe.

<sup>336</sup> Vano, nyuwo pooti opwinihiwa, imaara sinci-ene, mwa Nsina na Pwiya Yesu; masi ehikhanle wira epyo eyo Ekumii, moone, Eyo khenrowa ovaha ekumi. Nnari, nnari, nnari. Opatiiiso wa mmaasini ori ntoko okame omonre okhuma wirimu; pooti omorela vasulu v’epyo, masi, khiyaavo Ekumi mmwe, khenwerya okhala ekumi.

<sup>337</sup> Masi vakhala wira opatiiso ule w’ekeekhai wa mmaasini, wo okhwa mmansinyu, ni nyuwo moolikana wira mukhwe mwa sothene mutonko anyu wiixuttihiwa ni iyaaminelo ni miromolelo, sikanle soovirikana ni Masu, nto nyuwo munoorowa weetta ntoko mwaana mulopwana wala muthiyana a Muluku, ni nyuwo moolakela mmurimani mwanyu, nwehe etthu opatiiso owo wa mmaasini onrowaaya owiirihani voosiis’ula. “Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe soovonya sanyu, itampi sanyu, nto munimwaakhela Ehupu, mukuttho woohakhinyiwa. Munimwaakhela Eyeettiheryo, Erooho Yoowaarya. Tthiri natiri t’awinyu, ni othene aya. Wa maloko othene, onookhala.”

<sup>338</sup> Muluku Tithi, miyo—miyo nkireere olavula, ni nkireere okuxa okathi wa atthu, masi, Pwiya Muluku, khuwaavo weemexa ela. Enkhala paahi wira muhaana ohiya ni orowa, n’umumula, n’utthika. Hiyo ninkhala molumwenkuni onkhwa, eriyari y’atthu ankhwa; ni Mutthaka wa Ekumi, ni eyooniheryo ya ohihimuwa. Muluku Ootthuneya, hiyo ninrowa okhala atthu ankhwa emaara emosa, nto enrowa okhala exeeni hiyo nahiyaru okathi ula onivira?

<sup>339</sup> Mirima sahu sinoovihiwa; minepa sahu ti soohakalalihiwa; ala akenle. Nto anci-ene va aniiwa Mutthak’ola voosiis’ula. Ayo, imiya piili wala tthaaru aavenxa matata. Awo annitthuna waamini, Pwiya. Oh, vekeekhai epyo ele khekhwiye, Pwiya. Awo jaarowa owerya sayi ovenxa ntata siiso? Yookhala etthu. O Muluku, ti omiyo ole, ti mwaara a Yobi eemenle vale, airaka, “Oh!” Masi, Pwiya, mmutthuniherye Yobi owo, mulipaa-

oowaamini owo, akele, voosiis'ula, okhwa voomalela, ni ovithiwa va mmaasini mu mwa opatiiso.

<sup>340</sup> Mattoittoit a okame akhumme Wirimu, Masu a Muluku anihimya wira Awo anoorapiha khula etampi anoolevelela! Nyuwo mumpatisiwa mwa Nsina na Yesu Kristu, wa exeeni? Oleveleliwa wa itampi sanyu, itampi sinleveleliwa mwa Nsina na Yesu Kristu.

<sup>341</sup> Mutthuniherye, nto, Tithi, wira... Awo yakhala aretta, akhume akumi. Wira, yakhala oorakala, akhume yeettaka vathi va Owerya wa Erooho Yoowaarya. Yaakhalaka anatampi, akhume arapihiwe-ene ni oothuwa. Ni mekaanika, mwaha wo okela; Eyeettiheryo enkhuma Osulu, Erooho Yoowaarya, ni yaakuxe, Pwiya. Nvahe ekumi erutthu aya enkhwa, nto ninamwiiwa ilavulelo isya sooloka, owerya wa Muluku, ophenta ohinlavuleya, mahala mwaha wo okhwa ni mahala mwaha wo okhala akumi; ni Kristu ohihimunwe, Erutthu, Mwaakameliwa onimooniherya Owo elapo ya vathi.

<sup>342</sup> Tithi, awo t'Awinyu. Awo aavenxa matata. Miyo koolaleya Masu. Vano, Tithi, nwaakhele, miyo kinnivekela. Mwa Nsina na Yesu Kristu, kinniveka. Amen.

<sup>343</sup> Munnimpheenta Yoowo? Owo kahi oothamaleya? Moosiveliwa nyuwo okhala epantte ya ohihimuwa iwo wa Paasikha, wira moohihimuwa ni Yoowo? Nvenxe ntata. Muri muhina.

<sup>344</sup> "An'aka," ntoko Paulo saarowaawe ohimya. Khiphavelaka omutakiha, masi, ophenta, miyo kinnoophentani. Kiheetta mukwaha iphiro soowoopiha ni sothene sikina, wira kiphiye va, wira kiwerye olavula ni nyuwo. Kikumme mothakoni, omuvira mwanankhaya a etthapwe, ni sikina, wira kiphiye va. Hiyo niheetta mmuttekeni. Nyuwo munnivira mulaponi mweettihaka ikaaro, wira niwerye othukumana. Hiyo ninniphentana mmosa ni mukhw'awe.

<sup>345</sup> Hiyo na epantte ya mmosa ni mukhw'awe. Muhikhalakhale mmuhiyaka Satana wooleelani etthu ekina. Nikhalaka epantte ya mmosa ni mukhw'awe, na epantte ya Yoowo. Ni hiyo n'anammuttertheni a Momweneni, nimpuha iparakha iya, vamosa, sa ohihimuwa.

<sup>346</sup> Nto vano, moone, vano nyuwo moohihimuwa. Okathi Muluku omuhihimunxaawe, Owo ohohihimuxani. Mwaana vano ori wa nyuwo, ni vano nyuwo muniphuwela mwa Ekumi ntoko Yoowo, wira muhiximuxiwe voomalela nihiku nookiserya. Vooweryaneya, nyuwo muhaana naanaano va. Vansuweliwa sayi? Munep'anyu woorukunuwa, kahi siiso? Erutthu anyu yoophiyerya wiiwelela Yeeyo, kahi siiso? Wiiwelela (exeeni, ekereja?) Masu, yaawo akhanle Ekumi, vano nyuwo moohihimuwa mw'alipa-ookhwa. Owo Paasikha, ni Yesu ni miyo. Owo Paasikha, ni nyuwo ni Yesu. Ni owo Paasikha, ni

nyuwo, miyo, ni Yesu. Hiyo othene na . . . Ahiiso, Yesu, nyuwo, ni miyo, hiyo othene noohihimuwa vamosa.

347 Ni ninoorowa ohihimuwa nihiku nookiserya, hata irooho sahu sihiyaka irutthu sahu, hata irutthu sinyeelaka mukwitha, hata sikelaka mutthayani, hata sipahiwaka, hata sikhalaka vathi va ephareya. Bibilia ohimnye wira, “Nlaikha naahiyeeherya yawaya mphareya, n’itthu sothene saakhwiye khuhihimuwa.” Khiyaavo hat’etthu enwerya oniipithiha, wala onimwalaniha, Muluku ohinreeryaahu omphenta, onihihimunxe vamosa.

348 Muluku ooreeriheni. Kihoopisihani va okathi munci-ene. Vakhala wira atthu awo nlelo ari mutelefoonini mmo, vekeekhai. . . Isentavo miloko mithanu khula minuutu, awo khareere oliva, voosiis’ula. Masi, nkaawerya omaliha ewoora emosa, kaahaana otthikela paahi.

349 Vano, Apwiya yatthuna vale, kinootthika olelo ohiyu, wira kilavule ni nyuwo. Nto kaahiwerye, vano nto nyuwo othene moosuwela. . . Kinoona wira khaniri mu. . . wala mu. . . Khanikhanle-tho mutelefoonini? Khanikhanle-tho mutelefoonini.

350 Nyuwo othene moosuwela onrowaaka, khamunsuwela? wAfrika! Kihiiithaniwa okhuma khalayi; mwa miyaakha sinci-ene kinnitthunaka otthika. Vano yoowoona, Erooho y’Apwiya yoolokiherya ephiro. Awo ahimnye wira, okathi axineene elapo ale oohaawa yiiwale-aya, wahaaronwe-aka emaara yookiserya kaaryaaka wuuwu, yaahikokhorela vathi othana ni ohiyu, yiipulela ni wunla, yiiraka, “Apwiya, niinre-ni hiyo?” ikonto a yaawo. Atthu ale hata khanaamini wira aakhalana munepa. Munnona? Ni awo yaahinla ni wiipulela, ni wunla.

351 Muhihoolihe hata nuulumo. Xontte muhiire. Moone, vaakhanle wira waamwiiraneya eviisa ele ovira iwe ni okela eriyari ya arumeyi ale, awo yaamukeemexa vaavale vale. Kihaana okela ntoko mulipa-ooxaya. Miyo kinrowa wa pwiyamwene ole aaruuhale ivakawu muloko ni thanu na piili soosareya atthu ni aarwiye vamuthukumanoni. Kootthuniheriwa oxaya muttetthe awe. Ni kikelaka, epasaporte aka ni sothene enihimya mulipa-ooxaya, kahi muthukumano wa etiini.

352 Vano onoorowa okhala munna mmosa onrowa okumana ni miyo, ni wira, “Muhinkhalanela-ni muthukumano mwaamukhaani wa hiyo?” Istaatiyu soorentteriwa. Awo hata khansuwela. Munnona? Oh, ovuwa!

353 Kinvekela wira otthuna wa Muluku ohinkhoottiheriwe. Mwaha wa yeeyo, munepa aka oninlelakaaya wAfrika okhuma okathi okhummyaaka-wo, vaweryaneyeye otthikelawo-tho, nto kooruuheleni ihapari sa muthukumano muulupale. Alakela nkinrowa owoonani-tho, okhuma olelo, mpakha miyo otthika.

Ninrowa, mahiku vakhani paahi vano, mahiku yeettaka muloko a Maayu. Munookivekelela?

<sup>354</sup> Muupuwele, nyuwo khamunsuwela iye sikhlanle mikattiyamiho, mpakha ophiya weiwo; akhwiri khula epante, ni xetwani, ni muhuupuwele wira khansuwela etthu yo wira. Munnona? Ni vanreerela musuwele etthu enihimyaanyu, mwakhala ohoolo waya. “Masi koomusuwela Ole omwaaaminni aka, ni kookupali wira Owo onniwerya osuka ele miyo envaherenryaaka Yoowo wa nihiku nenlo.”

Vano, aakhala maleeso kamosa-kamosa apwehiwe va.

<sup>355</sup> Muluku Oophentiwa, ntoko Mutthak’ola voosiis’ula, wa ohihimuwa, ni miyo keemenle va, Pwiya, ni kooniheryaka ni Masu wira Owerya iwo woovaha ekumi ori mwa mwaana onaamini. Tivo, mwaha wo waamini, mwa waamini, wira Owerya iwo woovaha ekumi woorukunxa makhalelo aka. Ni athu ala annaamini, Pwiya, ni Owo woorukunxa makhalelo aya. Ni ninnivekelelana mmosa ni mukhw’awe.

<sup>356</sup> Miyo kiniixaatherya matata aka maleeso ala, wira... Muluku, Ole onvanhe ekumi Yesu Kristu ni khimuruuha okhuma mw’alipa-ookhwa, ni Erooho yeeyo emuhihimunxe Owo mw’alipa-ookhwa, ekhalaka mw’erutthuni mwahu.

<sup>357</sup> Erooho yaari mw’erutthuni mwa Elisewu, yoowo, vaamanlyaawe okhwa ni khuhikhala etthu woohikhala makhuva, yaahikhalana Owerya woovaha ekumi mwemmo. Matata a arummwa yaahikhalana Owerya woovaha ekumi. Muupuwelo w’arummwa, wona w’arummwa, ma—malumi a alipa-oowaamini, sothene saahikhalana Owerya woovaha ekumi.


<sup>358</sup> Vano Owerya yoowo woovaha ekumi, kihelaka Masu ala vasulu vaya, ni matat’aka wira emuthoonerye namakhalana, ni mahala, wa Owerya iwo woovaha ekumi, Owo ovahe ekumi khula emosa wa irutthu iya sinwereiwa, ni awo avonihewe-tho, Muluku, mwa Nsina na Yesu Kristu.

<sup>359</sup> Ehikhale paahi ya maleeso ala, masi w’atthu ale vamuthukumanoni vale, athu othene anihaaxeya. Axinamwane ale, aalweene, anakhaleru aani, Owerya iwo woovaha ekumi waavahe ekumi naanaano va, mwa Nsina na Yesu. Amen.

<sup>360</sup> Vano, akavi arina Owerya woovaha ekumi? Vano mwiixatheryane matata mmosa ni mukhw’awe, vakhala wira Owerya iwo woovaha ekumi ori mwa nyuwo.

<sup>361</sup> Vano, eri etthu emosa paahi ekhanle okhoottihaka Eyo, okhoottiha, iwo ohaamini wanyu. Muthiyana mmosa aahikwannya nlaya Nawe, khuvonihiwa; nakhotto muRooma aahimuseniyela wiitho Wawe, khurowa omooroni. Munnona? Vano eyo yaarina...eyo entthariha vatthu vary’anyu. Munnaamini Yeeyo? Munnaamini Yeeyo?

<sup>362</sup> Vano kintthuna wira muuramihe muru ni nvekelelane mmosa ni mukhw'awe. Paahi—nvekele vancipale paahi, mwiire, “Pwiya, mutth'ula”...Moone, nvekelelane mmosa ni mukhw'awe.

<sup>363</sup> Muluku Oophentiwa, hiyo niniira ela mwa Nsina na Yesu Kristu, Nsina nimoso paahi nivaheriwe eriyari y'atthu mwa nenlo naakhanly'ahu woopowaka wala ovonihwiwa. Atthu ala, akhanle anammuttettheni a Momweneni, anamakhalana Owerya woovaha ekumi, waavahe ekumi awo, Pwiya, naanaano va. Ni wira Erooho ekhume mwa xawawe mpakha xawawe, okhuma Masu mpakha Masu, mpakha omalela wa Yesu Kristu wooniheriwe mwa khula emosa wa irutthu, wa erutthu, erooho, wala etthu p'itthu entthunaaya, niixaatheryanaka matata mmosa ni mukhw'awe. Mwa Nsina na Yesu Kristu. 

65-0418M Ti Okhuma Wa Nsuwa  
Branham Tabernacle  
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)